

LA CARTA A LOS HEBREOS

YOOZ MAJCH PUNTU

1 ¹Tuqui timpuqui Yoozqui niiz puntunaca zizkatchiicha ućhum tuquita atchi ejpnacćquiz. Yoozqui niiz cuntiquiztan chiiñi profetanacćquiz jaknućquiztanami wiltan wiltan niiz taku zizkatchiicha. Nekztan nii profetanacaqui ućhum tuquita atchi ejpnacćquiz parlichiicha. ²Anziqui tii timpuquiz Yoozqui niiz Majch cjen ućhumnacaquiz juc'ant zizkatchiicha niiz puntunaca. Yooz Majchta tjapa žejlñinacaqui. Yooz Ejpqui niiz Majch cjen tjappacha paachiicha. Nekztan niiz Majch mantuquiz tjappacha utchiicha. ³Yooz Majchta Yooz Ejpćtan tsjii kuzzizpanćha, jalla nižtiquiztan Yooz Majchkazza Yooz Ejpć juc'ant zuma kuz tjeezñiqui. Nižaza Yooz Majch kjarquiz tii muntu žejlćha. Niiž chiića cjen tii muntu žejlñipanćha. Walja azzizza niiz chiićaqui. Nii Majchpacha ućhum ujnacquiztan ticzićha, ućhum pertunta cjsjapa. Jalla nekztan arajpacha ojkićha. Jalla nicju arajpach Yooz Ejpć žew latuquiz julzićha, mantiñijapa.

⁴Nii Yooz Majchqui tjapa anjilancćquiztan tsjan chawc jilirićha. Nižaza tjapa anjilnacćquiztan tsjan zuma puesto tanzićha. ⁵Yooz

Ejpqui ana jakzilta anjilćquizimi tuž chiićhićha:

“Amćha wejt Majchqui. Jaziqui amquin wejt kamañal tjaa-ućha”.

Jalla nuž cjican, ana jakzilta anjilćquizimi chiićhićha. Antiz niiz zinta Majchquiz alajakaz nuž chiićhićha. Nižaza Yooz Ejpqui niiz Majch puntuquiztan cjichizakazza:

“Wejrqui niizćajapa niiz Ejp cjeećha. Niiqui wejtćajapa wejt Majch cjequićha”.

⁶Wiruñ Yooz Ejpqui niiz zinta Majch tii muntuquiz cuchanćquiz pinsiscu tuž chiićhićha:

“Tjapa wejt anjilanacaqui wejt Majchquiz rispítla”.

⁷Yoozqui anjilnacć puntuquiztan tuž chiićhićha:

“Wejrqui wejt anjilanaca cuchnićha tsjii apura ojkiñi tjamićtakaz. Nižaza wejrqui wejtquiz sirwiñi anjilnacćquiz cjiskatućha tsjii uj peekstaćtakaz”.

⁸Pero niiz Majch puntuquiztan Yooz Ejpqui tuž cjichićha:

“Amćha Yoozqui. Am mantiz puestuqui wiñayjapa cjequićha. Am mantizqui lijitumapankazza.

⁹Amqui zuma lijituma mantiz pecñampanćha. Yooz

kuz quintrá paañinaca panž
chjaawjñamčha amqui. Wejrtčha
am Yoozqui. Amquiz juc'ant
honorchiz cjiskatchinčha, čhjul
žejlñinacžquiztanami”.

¹⁰Yooz Ejppui niž Majch puntuquiztan
cjichizakazza:

“Amqui Jilirimčha, tuqui
timpuquiztanpacha amqui
anaž čhjulquiztanami tii
mundo paachamčha. Nižaza am
kjaržtan arajpacha paachamčha.

¹¹Amqui wiñayjapam želaquičha.
Pero nii paata arajpachami
yokami tucuzinznaquičha. Tsjel
zquitižtakaz tucuzinznaquičha.

¹²Piižta zquitižtakaz tsjii latu
ectaž cjequičha. Liwj campiitaž
cjequičha. Amzti ana nižta
campiyaquičha. Amqui wiñay
wiñayjapa cjequičha”.

¹³Yoozqui niž Majchquiz tuž
cjichizakazza:

“Wejt žew latuquiz julzna,
am quintranaca kjojchtan
tjeczama”.

Jalla nuž Yooz Ejppui cjichičha niž
Majchquiz. Ana wira tsjii anjilžquiz nuž
čiichičha. ¹⁴Tjapa anjilanacačha ana
cheraña ojklayñiqui, Yooztajapakaz
sirwiñičha. Yoozqui ninaca cuchančha,
liwriita žoñinacžquiz yanapi.

LIWRIIŇI TAKU IMPORTIČHA

2 ¹Jilanaca, cullaquinaca, Yooz
puntu tjaajintanacžquiz juc'anti
kuz tjaaz waquizičha, werar zuma
kamañquiztan tsjii kjutñi ana chjitžta
cjsisjapa. ²Tuquiqui anjilanacaqui
žoñinacžquiz čiichičha. Jalla nii
čiitaqui walñitačha. Jakziltat
nii čiita jaru ana kamčhaja,
uj paachičha. Nekztan nii uj
paañinacaqui ninacž ana zuma
paatiquiztan jama castictapan

cjissičha. ³Nižaza tii timpuquiziqui
zuma liwriiñi takuqui učumnacaquiz
zumpacha kjanzt'itačha. Jalla nii
liwriiñi taku ana catokaquiz niiqui,
čkjaž Yooz castictiquiztan atipasajo?
Anapanž nii castictiquiztan atipi
atasachha. Primeraqui nii liwriiñi
takuqui Jesucristo Jiliriž paljaytatačha.
Nekztanaqui Jesucristuž tjaajinta
žoñinacaqui nii liwriiñi takupacha
učumnacaquiz lijituma paljaychičha.
⁴Jalla nuž paljayan Yoozqui
zuma pajk obranacami nižaza
ispantichucanacami, nižaza tjapaman
milajrunacami paachičha. Nižaza
Yoozqui criichi žoñinacžquiz niž
munañpacama niž Espíritu Santuž
tjaata kamañanaca tojunchičha. Jalla
nižta Yoozqui tjeezičha, nii liwriiñi
takumi lijitumačha, jalla nii.

JESUCRISTUQUI ŽOŇI CJISSIČHA

⁵Yoozqui niž wiñayjapa mantiz
puestuquiz anjilanaca ana utchičha.
Jalla nii puntuquiztan cjiřžcučha.

⁶Tsjii cjiřta Yooz takuqui tuž cjičha:

“Žoñičha anaž čhjulumi. Yooz
Ejp, čkjažtiquiztan amqui
žoñinaca cjuñjo? čKjažtiquiztan
žoñinacžquiz honorchiz
cjiskatjo? ⁷Tii kjaž watanaca
anjilanacaqui žoñžquiztan
tsjan jilir puestuquiz žejlčha.
Jalla nuž Yoozqui munchičha.
Nekztanaqui Yoozqui žoñžquiz
juc'ant honorchiz cjiskataquičha
anjilanacžquiztan. Nižaza
juc'ant zuma kamzqui žoñžquiz
tjaataž cjequičha. ⁸Yoozqui žoñž
mantuquiz tjapa tii muntupacha
utčha”.

Jalla nuž čiichičha Yooz takuqui.
Jaziqui Yoozqui žoñž mantuquiz
tjapa tii muntu žejlñinaca utchičha.
Jalla nižtiquiztan žoñž mantuquiz

tjappachapankaz cjequiĉha. Imazipanĉha tjappacha ŝonĝ mantuquiz ŝejlĉha.

⁹Pero Jesucristuĝ puntu naya. Niiqui tsjii kjaĝtapacha anĵilanaĉĝquiztan upa jilir puestuquiz cjskattataĉha, ŝonĵinaĉĝ laycu ticzjapa. Yooz ŝonĵinaĉĝquiz okzñiĝ cjen Jesucristuqui tjapa ŝonĵinaĉĝ laycu ticziĉha. Jalla nuĝ ticztiquiztan Yoozqui niĝquiz juc'ant zuma honora tjaachiĉha; niĝaza Jesucristuqui juc'ant zuma kamaña tanziĉha.

¹⁰Yooz cjen tjappacha ŝejlĉha, niĝaza niĝtajapa ŝejlĉha. Zuma Yoozqui pinsichiĉha, tjapa niĝ maatinacaqui pruebana watzcu, niĝtan chica honorchiz cjequiĉha. Jalla nii pinsichiĉha. Jalla niĝtiquiztan Yooz Ejppqui pinsichizakazza, Jesucristuqui sufrisnaca watzcu, ancha zuma Liwriiñi cjisnaquiĉha, jalla nii. Jesucristupankazza ŝonĵinaca Liwriiñiqui. Jalla nii liwriiñi pinsitaqui ancha zumaĉha. ¹¹Jaziqui Jesucristuqui ŝonĵinaĉĝquiz Yooz irata zuma kamañchiz cjskatasacĉha. Nii zuma kamañchiz cjskatñimi, niĝaza nii zuma kamañchiz cjskattanacami tsjii Yooz Ejpchizkazza. Jalla niĝtiquiztan Yooz Majchqui liwriita ŝonĵinaĉĝquiz “Wejt jilanaca” cjican chiiizjapa anaĝ azza. ¹²Yooz tawk liwruquiz Jesucristuqui tuĝ cjiĉha:

“Wejrqui wejt jilanacĝquiz Yooz puntu chiiĝinaĉha. Yooz partir ŝonĵinaĉĝtan ŝejlcan Yoozquin honora tjaaĉha”.

¹³Cristuqui zakaz cjiĉha:

“Wejrtĉha Yoozquinkaz kuzziztqi”.
Wilta zakaz cjiĉha:

“Yoozqui wejtquiz ŝonĵinaca tjaachiĉha, maatinacaĝtakaz.
Yooz Tata, tekz ŝejlĉha ninacami wejrmi”.

¹⁴Jesucristuĝ liwriita ŝonĵinacaqui curpuchizza, niĝaza ljocchizza. Jalla

niĝtiquiztan Jesucristuqui curpuchiz niĝaza ljocchiz zakaz cjsiĉha. Jalla niĝta curpuchiz cjsicu, ticziĉha ana wal diablu tjatanzjapa. Nii diabluqui konz poderchizza. Pero ticztiquiztan Jesucristuqui diabluĝ poder atipchiĉha. ¹⁵ŝonĵinacaqui ticz ekskui diabluĝ mantuquizpan ŝejlĉha. Nii ŝonĵinaca liwriizjapa, Jesucristuqui ticziĉha. ¹⁶Jesucristuqui tii muntuquiz tjonchiĉha, ana anĵilanaĉĝquiz yanapzjapa antiz Abrahamĝ majchmaatinacĝquiz yanapzjapa. Jakziltat Jesucristuĝquin kuz tjaaĉhaja jalla ninacaqui Abrahamĝ majchmaatinacaĝtakazza. ¹⁷ŝonĵinaca liwriiñi cjisjapa, Jesucristuqui ŝonĵinaca iratpacha cjistanĉha. Jalla nuĝ ŝonĵinaca irata cjican, Jesucristuqui ŝonĵinaĉĝtajapa zuma lijitum palt'iziñi cjsiĉha Yooz yujcquiziqui. Okzñi kuzzizza uĉhum palt'iziñiqui. ŝonĵinaĉĝtajapa palt'iziñi cjican Jesucristuqui Yoozta zuma wilanaĝtakaz ticziĉha. Jalla niĝta ticziĉha, ujchiz ŝonĵinaĉĝ laycu. ¹⁸Jesucristupacha sufrichiĉha, niĝaza diabluqui Jesucristo yanziĉha ujquiz tjojtskatzjapa. Pero sufrisquiztanami diabluĝ yanĝtanami atipchiĉha. Jalla nuĝ tjapa atipĝcu Jesucristuqui ŝonĵinaĉĝquiz yanapi atasacĉha, ana ujquiz tjojtskatzjapa.

JESUCRISTUQUI MOISESQUIZTAN TSJAN JILIRIĉHA

3 ¹Yooz kamañchiz jilanaca, cullaquinaca, Yoozqui anĉucaquiz kjawziĉha Jesucristuĝquin kuzziz cjisjapa. Jalla niĝtiquiztan arajpach wajtchiz mazinaca cjissinĉhucĉha. Anĉhucqui Jesucristuĝ kuz zumpacha naya. Jalla niiqui uĉhumnacalta tsjan jilir apóstol cuntaĉha, Yooz puntu zuma

tjaajinchiz cjen. Nižaza učhumnacalta timpluquiz langzñi pajk jiliri cuntača, učhumnacatan Yooztan zuma cjiskatchiz cjen. ²Tuquiqui Yoozqui Moisés utchiča tsjii puestuquiz. Moisesqui nii puesto zuma cumplichicha, Yooz kjuychiz žoñinacžquiz sirwican. Jalla nižta irata Yoozqui Jesucristo tsjii puestuquiz utchiča. Jesucristo zakaz nii puesto zumapan cumplichicha Yooz kjuychiz žoñinacžtajapa. ³Tsjii kjuy kjuyñi zoñiqui nii kjuyquiztan tsjan honorchizza. Jalla nižta irata Jesucristuqui Moisesquiztan tsjan honorchizza. Jalla nuž waquizichicha. ⁴Zapa kjuyaqui tsjii žoñiz kjuytača. Pero Yoozza tjappacha paataqui. ⁵Yooztajapa sirwiñi Moisesqui niiz puestuquiz zuma cumpliñi kamchiča, tjapa Yooz kjuychiz žoñinaca irpican. Moisesqui Yooz puntunaca tjaajinchicha. Jalla nižta tjaajincan Moisequi Yoozquin sirwichicha. Wiruñiqui nii Yooz puntunacaqui tsjan kjana tjaajintatača. ⁶Jesucristuzti anača Yoozquin sirwiñikazza. Antiz Yooz Majchpanča. Jalla niiqui niiz puestuquiz zuma cumpliñi kamchizakazza, Yooz kjuychiz žoñinacžquiz mantican, tsjii jilir maatižtakaz. Nižaza učhumnacacha Yooz kjuychiz žoñinacaqui. Jakziltat tirapan Yoozquin tjurt'ichi kuzzizlaja, jalla niiča ultimu Yooz kjuychiz žoñiqui. Jesucristuqui taku tjaachiča, Yooz žoñinacaqui arajpachquin niižtan chica kamaquiča, jalla nii. Jaziqui jakziltat Jesucristuž tjaata takuž cjen chipchi kuzzizlaja, jalla niiča ultimpacha Yooz kjuychiz žoñiqui.

ANA CHOJRU KUZZIZ CJEE

⁷Jalla nii puntuquiztan Yooz Espíritu Santuqui Yooz tawk liwruquiz tuž cjiča:

“Anztan Yooz kjawžta nonžcu, ⁸anaž chojru kuzziz cjee. Ančhuca tuquita atchi ejpnacaqui ch'ekti yokquin žejlcan, chojru kuztan Yooz quintru cjissicha. Chojru kuztan persun kuzcamakaz kamz pecchiča, Yooz žawjwa zjijquinzjapa. ⁹Pusi tunc watanaca ninacaqui Yooz pajk obranaca cherchiča. Jalla nuž cheržcumi, tirapan Yooz žawjwa zjijquinz pecchiča. Anapan criyatča. ¹⁰Jalla nižtiquiztan nii žoñinacž quintru žawjziča Yoozqui. Ninacž puntuquiztan Yoozqui tuž cjichiča: ‘Ninacž kuzqui tsjii kjutñipan pinsiča. Wejt zuma kamaña ana pajz pecča’. Nuž cjichiča Yooz Ejppqui. ¹¹Jalla nižtiquiztan Yoozqui ninacž quintru žawjžcu, tsjii juramentužtan chiižinchicha, tuž cjan: ‘Anapan wejt famillquiz luzkatača, wejtan chica jeejzjapa’ ”.

¹²Jilanaca, cullaquinaca, persun kuzquiz cuitasa, Yoozquin ana criichi kuzziz ana cjisjapa. Anawal kuzziz cjequiz niiqui, ultim žejtñi Yoozquiztan zarakzkatta cjequicha. ¹³Tii timpuquizkaz Yoozqui žoñinaca kjawznaquiča, jaziqui zapurupan porapat p'ekinchayasaquiča, Yoozquin nonznajo. Anapanž ančhucqui persun uj paažcu incallskataquiča, Yooz quintru paazjapa. Jalla nižta anawali paažcu chojru kuzziz cjisnasacha ančhucqui. Nekztan Yooz kjawžta ana nonžni atasacha. Ančhucqui jalla nižta anazum kuzziz ana cjisjapa, porapat p'ekinchayasaquiča. ¹⁴Tuquiqui učhumqui Jesucristužquin kuz tjaachinchumča. Jakziltat tirapan

ticzcama Jesucristužquin tjurt'ichi kuzziz kamčhaja, jalla niiqui ultimu Cristužtan tsjii kuzzizza.

¹⁵ “Tonjpacha tii Yooz taku nonžna: Anztan Yooz kjawžta nonžcu, anaž chojru kuztan Yooz quintra cjee. Jaknužt ančhuca tuquita atchi ejpnaca chojru kuztan Yooz quintra želatčhaja, anaž nižta cjee”.

¹⁶ Egipto yokquiztan Moisés irpita žoñinacauqui, jalla ninacatača Yooz quintranacauqui. Yooz taku nonžcupacha ninacatača chojru kuzzizpan. ¹⁷ Nekztan Yoozqui pusi tunc wata ninacžtajapa žawjchiča. Ninacaž uj paatiquiztan žawjchiča. Nekztan ninacauqui ch'ekti yokquin walja ticziča. ¹⁸ Nižaza Yoozqui tsjii juramentužtan chiižinchiča, “Anapan wejt famillquiz luzkatača ančhucqui wejtta chica jeejzjapa”, cjican. Jalla ninacača Yooz taku ana cazñinacauqui. ¹⁹ Jalla ninacauqui ana criichiž cjen, Yooz wajtquin ana luzi atchiča. Jalla nii kjanapacha intintita cjesača.

YOOZ FAMILQUIZ LUZA, NIIŽTAN JEEJZJAPA

4 ¹ Tuquiqui Yooz Ejpqui taku ecchiča tuž cjican, “Jakziltat weriž kjawžta nonžaj niiqui, wejtta chica jeejznaquiča, nižaza liwriita cjesača”. Nii Yooz ecta takuqui tirapan walča. Jaziqui učumqui persun kuz cuitila. Persun kuz ana cuitaquiž niiqui, ana Yooztan chica jeejznačhani. ² Učumnacauquizimi tuquita ejpžquizimi nii zuma liwriiñi Yooz taku paljaytatača. Pero ninacauqui inakaz nonziča, ana criichiž cjen. ³ Učumqui nii liwriiñi taku catokžcu criichinčumča. Jalla nižtiquiztan liwriitaž cjen Yooztan chica jeejža. Pero ninacž puntuquiztan Yoozqui cjichiča:

“Ninacž quintra žajwžcu, wejrqui tsjii juramentužtan chiičinča, tuž cjican: ‘Ninacauqui wejtta chica ana jeejznaquiča, anapan wejt famillquiz luzkatača’ ”.

Yoozqui tii muntu paažcu, nii langz žerziča; sojta tjuñinacakaz langziča. ⁴ Pakallak tjuñ puntuquiztan tsjii Yooz takuqui tuž cjiča:

“Pakallak tjuñquiziqui Yoozqui tjapa niž muntu paaz langzquiztan jeejziča”.

⁵ Tsjii zakaz Yooz takuqui cjiča:

“Nii uj paañi žoñinacauqui anapan wejtta chica jeejznasača, wejt famillquiz cjisjapa”.

⁶ Nii tuquita ejpnacauqui liwriiñi taku nonžcu ana Yooz famillquiz cjissiča, Yooz tawk jaru ana kamchiž cjen. Jalla nižtiquiztan anziqui iya žoñinacauqui Yooz famillquiz cjesača. ⁷ Yoozqui anza timpuqui sitchiča, žoñinaca wilta kjawzjapa. Ažk watanaca nii tuquita ejpnacžquiz chiižcu Yoozqui Davidžquiz chiikatchiča, tuž cjican:

“Anza žoñinacami, nižaza jazta žoñinacami, Yooz taku nonžcu, ana chojru kuzziz cjee”.

Jalla nii Yooz takuqui tuquitanpacha chiižintača. ⁸ Josuequi žoñinacžquiz ultimu jeejskattasaž niiqui, Yoozqui ana chiitasača, iya timpu želaquiča žoñinacaž Yooz famillquiz jeejzjapa. ⁹ Jalla nižtiquiztan anza timpuquizzakaz Yoozquin kuzziz žoñinacauqui Yooz famillquiz luzasača, Yooztan jeejzjapa. ¹⁰ Jakziltat Yooz famillquiz luzzaja, jalla niiqui ch'aman kamznacquiztan jeejža, jaknužt Yoozqui niž mundo paaz langztiquiztan jeejztčhaja, jalla nižta. ¹¹ Jalla nižtiquiztan učumnacauqui Yoozquin tjapa kuz tjaaz waquiziča, Yooztan jeejzjapa, nižaza Yooz famillquiz kamzjapa. Učum tuquita

atchi ejpnacaqui ana criichiž cjen ana Yooz familliquiz luzzičha, antiz castictatačha. Jalla ana nižta casticta cjisjapa, učumqui criizpanž waquizičha.

¹²Yooz takuqui žejtñi Yooz azzizza, žoñinacž kuzquiz zuma, ana zuma, jalla nii tjeezjapa, nižaza cjuñskatzjapa. Nižaza nii Yooz takuqui tsjii porap latu archiz cuchillužtakazza. Pero tsjan aričha. Yooz takučha žoñž animquizimi kuzquizimi uj cjuñskatñiqui. Tsjii žoñž kuzqui parti žoñinacžquiztan chjojta cjesaž niimi, jalla nii kuzquiz Yooz takuqui uj cjuñskatasachha. Nižaza Yooz takuqui žoñž kuzquiz pinsitanacami tantiitanacami kjanapacha tjeeža, zuma ana zuma, jalla nii. ¹³Yoozqui tjappacha paachičha. Jalla nižtiquiztan anaž jakziltami nižquiztan chjojžñi atasachha. Ultim pjalz tjuñquiziqui tjappacha persun kamañ puntuquiztan, nižaza kjažtat kamčhaja, jalla nii puntunacquiztan cuenta tjaastančha. Tjapa žoñinacaz kamta puntunacquiztan Yoozqui liwj zizza, nižquiztan ana tsjii takumi chjojžñi atasachha.

JESUCRISTUČHA UČHUM PALT'IZIÑIQUI

¹⁴Jesucristučha Yooz Maatiqui. Jalla niičha učum chawjc timplu jiliri cuntačha. Nižaza niiqui arajpachquin Yooz yujcquin luzzičha, učumnacaltajapa tsjii wali palt'iziñi cjisjapa. Jalla nižtiquiztan učumqui Jesucristužquin kuzziz kamcan jalla nii kamzquiz tjurt'ichi kuzziz cjila. ¹⁵Učumqui Yooz irata zuma kamzjapa panž pjaltičha. Pero Cristuqui zuma okzñi kuztan učum criichinacžquiz cjuñčha, nižaza yanapasačha. Učum irata Jesucristuqui pruebanaca watchičha. Ana uj paacan tjapaman

pruebanaca watchičha. Jalla nižtiquiztan, Jesucristuqui zuma okzñi kuztan učumnacaltajapa palt'izinasachha. ¹⁶Jalla nižtiquiztan čhjul pruebanaca watanami učumnacaqui okzñi Jesucristužquin tjapa kuztan cjee. Yooz yujcquin macjatz ana jiwjataquičha, učum ujnaca pertuna mayizizjapa, nižaza pruebanaca želan, Yoozquiztan mayizaquičha nii pruebanaca zuma watzjapa.

5 ¹Tjapa timplu jilirinacaqui žoñinacžquiztan illztatačha, žoñinacžtajapa Yoozquin palt'izinajo. Nižaza nii timplu jilirinacaqui žoñinacž wilananacami Yooz yujcquiz timplu altarquiz nonžñitačha, žoñinacž ujnaca pertunta cjisjapa. Nižaza žoñinacžtajapa ninacž ofrendanaca Yooz yujcquiz tjeezñitačha. ²Timplu jilirinacapacha pruebanaca sufričha, parti žoñinaca irata. Nižaza uj paačha parti žoñinaca irata. Jalla nižtiquiztan nii jilirinacaqui pasinziz kuzziz cjesachha ana zizñi žoñinacžtajapami, nižaza tsjii kjutñi cjicjiñi žoñinacžtajapami. ³Ujchiz zakaz cjicanaqui nii timplu jilirinacami persun ujnacquiztanami nižaza parti žoñinacž ujnacquiztanami Yoozquin wilana tjaastančha, pertunta cjisjapa.

⁴Nižaza anaž jakziltami timplu jilirž puestuquiz persun kuzcama luzasačha. Yoozqui žoñinaca kjawža, nii puestuquiz utzjapa. Jaknužt Yoozqui Aarón cjita žoñi utčhaja, jalla nižta. ⁵Nižaza Cristuqui anaž persun kuzcama palt'iziñi puestuquiz luzziqui. Yoozpankazza nii honorchiz puestuquiz utchiqui. Nižaza Yoozqui Cristuž puntuquiztan tuž cjichičha:

“Amčha wejt persun maatimqui.

Amquiz wejt kamañal tjaa-učha”.

⁶Cristuž puntuquiztan Yoozqui zakaz cjicha:

“Amĉha žoñinacĉtajapa palt'iziñi
jiliriqui wiñay wiñayajapa.
Jaknužt Melquisedec cĵitaqui
zuma palt'iziñi jiliri uchtatažlaja,
jalla nižta”.

⁷Tii muntuquiz kamcan Jesucristuqui
Yooz Ejpžtan parličičha, nižaza
Yooz Ejpžquin rocchiĉha, tjurt'iñi
kuzzizpan kami yanapzjapa. Altu
tawkžtan chiican nižaza kaacan
Yoozquin jalla nuž mayizichiĉha.
Yoozqui Jesucristo liwrii atatĉha, ana
cruzquiz ticzjapa. Pero Jesucristuž
ticzquiztan ana liwriitaž cjenami
Yooz Ejpqui nižquiz yanapchiĉha,
Yooz kuzcamapankaz kamzjapa.
Jesucristuqui Yooz Ejpžquin kuzziz
cjen yanaptataĉha. ⁸Cristuqui Yooz
Majch cjenami sufrichiĉha. Jalla nižta
tii muntuquiz sufrichiž cjen Yooz Ejpž
kuzcamapankaz kamchiĉha. ⁹Jalla
nuž tii muntuquiz sufrichiž cjenami,
jalla niiĉha Yooz kuzcamapankaz
kamñiqui. Jalla nižtiquiztan žoñinaca
liwriiñiqui cjissiĉha. Jakziltanacat
nižquiz cazzaja, jalla tjapa ninacaqui
wiñayjapa liwriitaž cjequiĉha. ¹⁰Yooz
Ejpqui Cristo utchica žoñinacĉtajapa
liwriiñi nižaza palt'iziñi cĵisjapa.
Jaknužt Melquisedec cĵita žoñiqui
palt'iziñi jiliri uchtatažlaja, jalla
nižtapacha.

PERSUN KUZ CUITASAQUIĈHA

¹¹Jalla nii puntuquiztan waljaž
takunacaž žejlĉha. Pero ch'amaĉha
anĉhucaquiz intintiskatzqui. ¹²Ažk
watanaca anĉhucqui criichinĉhucĉha.
Jaziqui Yooz puntu tjaajiñi
maestrunaca cjichuca cjiwĉha.
Pero wiltakaz anĉhucqui tjaajinta
cĵis pecĉha Yooz tawk pjasilanaca
zizjapa. Anĉhucqui wawanacažtakaz
lichikaz pecĉha Yooz tawk ĉheri
lujlzquiztanaqui. ¹³Lichtan mantinasñi

wawažtakazza anĉhucqui. Jaziqui
lijitum Yooz kamaña ana zuma
kamiñĉhucĉha. ¹⁴Ĉheri lujlzqui
pajk žoñinacĉtaĉha. Jalla nižta
irata ch'aman intintazuc puntunaca
zuma criichi žoñinacĉtajapaĉha.
Jalla ninacaqui zuma kamchiž cjen
zumpacha tantiyasaĉha kamañ
puntunaca, zuma, anazuma, jalla nii.

6 ¹Pjasil Yooz puntuacquižtan
zizñi, cjee. Jesucristuž
puntuquiztan tjaajintanaca
zizzinĉhucĉha. Jalla nižtiquiztan
anĉhucqui nii puntunacquižtan anaž
iya tjaajinz pecasaĉha, jalla. Anĉhucqui
zizzinĉhucĉha, casticu zĵijcñi
paaznaca puntuquiztanami nižaza
kuz campiiz puntuquiztanami, nižaza
Yoozquin kuz tjaaz puntuquiztanami,
²nižaza bautismo puntuquiztanami,
nižaza kjaržtan lanz cuzturumpi
puntuquiztanami, nižaza ticziquiztan
jacatatz puntuquiztanami, nižaza ultim
pjalz tjuñi puntuquiztanami. Jalla
nižtanaca zizzinĉhucĉha anĉhucqui.
³Yooz munan, iya Yooz puntunaca
tjaajnasacĉha, juc'ant zuma kamañchiz
cĵisjapa.

⁴Jakziltat kjanzt'ita Yooz taku
catoktĉhaja, jalla nuž catokzpacha
Yooz quintra quejpsaja, jalla niiqui ana
wilta liwriita cjesaĉha. Jakziltat Yooz
taku catoktĉhaja, jalla niiqui Yooz
kamañquiz luzzipanĉha, nižaza Espiritu
Santuqui niž kuzquiz luzziĉha. ⁵Nižaza
ninacaqui Yooz taku zuma nayžcu
catokchiĉha. Nižaza arajpachquiztan
tjonñi azi pajchiĉha persun kuzquiz.
⁶Jalla nižta Yooz taku catokchi
žoñinacaqui Yooz quintra quepsnaquiž
niiqui, anaž wilta kuz campii atasacĉha
zumquinaqui. Ninacž kuzqui chojrupan
cjissa. Jalla nižta cĵiscu, ninacapacha
Jesucristo Yooz Majch wilta cruzquiz
ch'awcetažokazza, niž quintra žoñinacž

yujcquiz cjecjiñiċha. ⁷Tii quintu nonžna. Tsjii yokaqui zkala ċhjaczha. Jalla nekztan ċhijñiž tjonċha. Jalla nekztan nii zkalaqui zuma ċhjeriž tanċha. Nižazaž pookċha, nii zkala ċhjaczni žoñinaczċtajapa. Nii yokaqui Yoozqui wintijċhiċha. ⁸Pero nii yokaqui ch'apinaczċhizkaz cjisnasaž niiquei, inakaz cjequiċha. Jalla nižtiquiztan pjalžta cjequiċha, ana zuma. Jalla nekztan ujquin tewjkžnaquiċha. Jalla nižtaž nii Yooz taku catokžpacha quejpsni žoñiquei.

YOOZQUIN KUZZIZPAN CJEE

⁹Pecta jilanaca, cullaquinaca, jalla nuž ċhižcumi anċhuca puntuquiztan anaċha nižta ċjiwċhiya. Anċhucqui liwriita cjisicu ultimpacha anċhucqui zuma Yooz kamañchiz kamaquiċha. Jalla niiquei nužupanċha. ¹⁰Yoozqui ancha zumapanċha. Anċhucaquiztan anaž tċatznasaċha, anċhucaž zuma kamċhiž cjen, nižaza anċhucaž Yooztan zuma munaziñi kuzziz cjisiz cjen. Anċhucqui jalla nižta kamañchiz cjen parti criichi jilanaczċquiz sirwichinċhucċha Yooztajapaqui. Tuquimi anzimi zakaz anċhucqui nižta zuma kamañchizza. ¹¹Zapa mayni anċhucaquiztan nižta zuma kuzzizpan cjee, juc'ant juc'ant zuma kamañchiz cjisjapa, ticzcama. Anċhucqui tirapan tjewzna, arajpachquin Yooztan zuma kamz, jalla nii. Nižaza nii oracama, juc'ant juc'ant zuma kamañchiz cjee. Jalla niil pecuċha. ¹²Anċhucqui ana jayrazni kuzziz cjee. Antiz zuma Yoozquin kuzziz žoñinaczċquiz yatekasa. Nižaza pasinziz kuzziz žoñinaczċquiz yatekasa. Nižta kamni žoñinacaqui Yooz ċhiita zumanaca tanznaquiċha, tsjii irinsažtakaz.

¹³Yoozqui Abrahamžquiz tsjii zuma taku tjaažcu, persun achtan juramento

paachiċha. Niižquiztan tsjan jilir juramento tjaakatni ana želatċha. Jalla nekztan persun achtan juramento paachiċha, ¹⁴tuž cċjican: “Ultimpacha wejrqui amquin zumanacal tjaažcaċha, nižaza am majchmaatinaca walja mirkataċha”. ¹⁵Abrahamqui Yoozquin kuzzizpan tjewžcu, nii Yooziž tjaata taku tanziċha. ¹⁶Tsjii juramento tjaañi žoñiquei nii juramento tanzni žoñžquiztan tsjan jiliriċha. Tsjii juramento paažcu, anaž iya parliz želasaċha. Jalla nii puntuquiztan žeržtaċha. ¹⁷Jaziqui Yoozqui tsjii juramento paažcu taku tjachiċha. Nekztan Yoozqui nii tjaata taku tanzni žoñinaczċquiz kjanapacha tjeez pecċhiċha, niiž tjaata taku panž cumpliskataquiċha, jalla nii. Yoozqui niiž ċhiita taku ana campiyasaċha. ¹⁸Yoozqui taku tjachiċha, uċhumqui nižtan ċhica kamaquiċha, jalla nii. Nekztan juramento paachiċha. Jalla nii pizc taku anapan campiyasaċha tsjii tsjii ċhiicanaqui. Yoozqui ana toscara ċhiyasaċha. Uċhumqui Yoozquin macjatchinċhumċha, niiž cuitita cjisjapa. Uċhum cuitiñi Yooza taku cumpliñiquei. Jalla nižtiquiztan Yooz taku cumpliz ora tjewžcan p'ekinchayta kuzzizpan cjesaċha uċhumqui. ¹⁹Jalla nii cumpliñi Yooziž ċhiita taku ċjuñžcupan uċhum kuz tjurt'ichi ċjiskatċha, ana kuz turwayskatċhuca. Nii taku cumpliñi Yoozqui warcu anclažtakaz, uċhum kuz tjurt'ichi ċjiskatċha. Jesucristuž cjen Yoozqui niiž tjaata taku cumplaquiċha. Jesucristuqui arajpachquinpacha Yooz yujcquiz luzziċha. ²⁰Uċhumž tuqui luzziċha, uċhumnacaltajapa palt'izinžjapa. Jesucristuqui zuma palt'iziñi ċjisiiċha, jaknužt Melquisedec palt'iziñi ċjitċhaja, jalla nižta. Jalla nižtiquiztan

uĉhumnacaltajapa ultimu palt'iziñi puestuquiz luzziĉha.

MELQUISEDECŽ PUNTU

7 ¹Nii Melquisedec cĵita palt'iziñiqui Salem wajt jiliritaĉha, niĵaza niĵ puestuquiz zinta arajpach Yooziĵ uchtataĉha. Melquisedecĵ timpuquiz Abrahamqui quintra reynacĵtan tsjii quira zalĉiĉha, ninacĵ zultatunacĵtanpacha. Nekztan Abrahamqui liwj atipĉiĉha. Jalla nuĵ Abrahamĵ atipĵtan Melquisedecqui Abrahamĵtan zalĉiĉha. Nekztanaqui Melquisedecqui Abrahamĵtajapa Yoozquin palt'izinĉiĉha, Abrahamĵquiz Yooziĵ yanapta cĵisjapa. ²Nekztan Abrahamqui Melquisedecĵquiz tjapa niĵ cantiquiztan diezmo tjaachiĉha. Melquisedec tjuuqui tuĵ cĵiĉha, Yooz kuzcama zuma mantiñi, jalla nii. Niĵaza Salem tjuuqui tuĵ cĵiĉha, ŷoĵinaca walikaz ŷejlĉha, jalla nii. Melquisedecĵ puntu cĵiĉha, niĵ mantichiĵ cĵen, ŷoĵinaca walikaz ŷejlĉha. ³Yooz takuqui anaĵ chiĉha, Melquisedecĵ maa ejpĵ puntuquiztanami, niĵ atĉi ejpnacĵquiztanami, niĵ majttiquiztanami, niĵ ticzquiztanami. Jalla niĵtiquiztan palt'iziñitaĉha Yooz Majch irata.

⁴Jaziqui Melquisedecqui pajk jiliriĉha. Nii naya anĉhucqui. Uĉhum tuquita ejp Abrahamqui quira atipĵcu Melquisedecĵquiz tsjii tunca parti niĵ cantiquiztan tjaachiĉha. Jalla niĵtiquiztan Melquisedecqui Abrahamĵquiztan juc'ant jiliriĉha. ⁵Moisĉs lii jaru Levĵ cĵita majchmaatquiztan tjoĵi ŷoĵinacakaz timplu jilirĵ puestu tanznasaĉha, ŷoĵinacĵtajapa Yoozquin palt'izinĵapa. Jalla nii timplu

jilirinacaqui parti ŷoĵinacĵquiztan ninacĵ ŷelinĉizquiztan diezmo cobriñitaĉha. Aunquimi nii cobrita ŷoĵinacaqui timplu jilirinacĵ familiataĉha. Tjapa ninacaqui Abrahamĵ ejpĵquiztan tjoĵitaĉha. Jalla niĵtiquiztan Melquisedecqui nii timplu jilirinacĵquiztan juc'ant jiliriĉha. ⁶Melquisedecĵti ana Leviĵ majchmaatquiztan tjoĵitaĉha. Pero Abrahamqui niĵquiz diezmo tjaachiĉha. Niĵaza Melquisedecqui Abrahamĵquiz wintizuna tjaachiĉha, Yooz Abrahamĵquiz taku tjaachiĵ cĵenami. ⁷Wintizuna tjaaĵi ŷoĵiqui tsjan jiliriĉha wintizuna tanzĵi ŷoĵĵquiztan. Anaĵ jakziltami nii razuna nicasaĉha. ⁸Tii muntuquiz kamcan ŷoĵikazza uĉhumnacaquiz diezmo cobriñiqui. ŷoĵinacaĉha ticzĵiqui. Pero Melquisedecĵ puntuquiztanaqui Yooz takuqui niĵ ticz puntuquiztan ana chiĉha, wiĵayjapa ŷejtĵjapaĵtakazza. ⁹Melquisedecĵ timpu wattan Leviĵ majchmaatquiztan tjoĵi timplu jilirinacaqui diezmo cobriñitaĉha. Nii cobriñi ŷoĵinacapacha Abrahamĵ majchmaatquiztan tjonĉiĉha. Jalla niĵtiquiztan Abrahamĵ diezmo Melquisedecĵquiz pactiquiztan, ninacazakaz pactaĵokazza. ¹⁰Abrahamĵ curpuquiz niĵ majchmaatinaca ŷelatĉha, ima majttataĉha. Jalla niĵtiquiztan Abrahamĵ Melquisedecĵquiz diezmo pactiquiztan, Leviĵ majchmaatquiztan tjoĵi timplu jilirinacaqui zakaz pactaĵokazza. ¹¹Leviĵ parti timplu jilirinacaqui Israel wajtĉiz ŷoĵinacĵquiz Moisĉs lii jaru kamkatchiĉha. Niĵaza nii jilirinacaqui parti ŷoĵinacĵta Yoozquin palt'iziñitaĉha. Nii Leviĵ parti ŷoĵinacaqui Aaronĵ majchmaatquiztan tjoĵitaĉha. Jaziqui ninacaqui

parti žoñinacžquiz Yooz yujcquiz zumapankaz cjiskattasaž niiqui, anaž iya palt'iziñi pectasača. Nii wiruñ tjonñi palt'iziñiqui anaž Aaronž majchmaatquiztan tjonñiča. Antiz Melquisedecž partiquiztan tjonchiča. ¹²Palt'iziñi timplu jilirinacaqui campiitaž cjenauqui, lii zakaz campiitaž cjistantača. ¹³Nii wiruñ tjonñi palt'iziñiqui Jesucristo Jiliriča. Jesucristuqui anača Leviž partiquiztan tjonñiqui. Antiz Judaž majchmaatquiztan tjoñitača. Pero Moisés lii jaru anaž jakziltami Judaž partiquiztan timplu jilirž puestuquiz uchtatača. ¹⁴Timplu jilirinacž puntuquiztan Moisesqui anaž čhjulumi chiichiča Judaž parti žoñinacžquiz. Judaž parti žoñinacaqui anapan timplu jilirž puestuquiz luzasača. Pero kjanapachača Jesucristuqui Judaž partiquiztan tjoñi.

¹⁵Jalla nižtiquiztan kjanapachazakazza Moisés lii campiitaqui. Melquisedecžtakaz Jesucristuča tsjemat timplu jiliriqui, žoñinacžtajapa Yoozquin palt'izinzjapa. ¹⁶Moisés liiqui cjiča, ticžni timplu jilirinacaqui Leviž majchmaatquiztan tjonñi žoñinacapankaz cjequiča. Jesucristuqui anaž nii lii jaru timplu jiliri cjissiča. Antiz niž wiñayjapa žejtñi kamañquiztan timplu jilirž puestuquiz uchtača, wiñayjapa žoñinacžtajapa Yoozquin palt'iziñi cjisjapa. ¹⁷Jesucristuž puntuquiztan Yooz takuqui tuž chiicha:

“Amqui wiñayjapa timplu jiliri cjequiča žoñinacžtajapa palt'iziñi. Melquisedecž partiquiztan cjequiča”.

¹⁸Tuquita liiqui nužquiz apatatziča. Nii liiqui ana azzizza žoñinaca zumapan kamkatzjapa. Jalla nižtiquiztan ana iya walča. ¹⁹Nii

Moisés lii jaru kamtiquiztan anaž jakziltami Yooz yujcquiz zumapankaz cjiskattaž atasača. Jaziqui tsjii ew lii žejlča; učhumnacaltajapa juc'ant zumača. Nii lii jaru Jesucristuqui Yoozquin palt'iziñi puestuquiz luzziča. Jesucristuž cjen učhumqui Yoozquin macjatasacha.

²⁰Yoozqui juramentužtan Jesucristo utchiča palt'iziñi puestuquiz.

²¹Tuquita palt'iziñi timplu jilirinacaqui ana juramentužtan nombritatača. Pero tii Jesucristo timplu jilirizti juramentužtan nombritača. Yooz takuqui tuž cjiča:

“Yooz Jiliriqui juramentužtan tuž mantichiča: Amqui wiñayjapa timplu jilirim cjequiča žoñinacžtajapa palt'iziñi, Melquisedec partiquiztan. Jalla nuž mantižcu, Yooz kuzquiz pinsitaqui wira ana campiyasača”.

²²Nii Yooz chiitaž cjenauqui Jesucristuča tuquita timplu jilirinacžquiztan žoñinacžtajapa juc'ant zuma Yoozquin palt'iziñiqui. Jalla nižtiquiztan žoñinacaqui wiñaya liwriitapan cjequiča. Nii ew liiqui tuquita liinacquiztan juc'anti zumača.

²³Nii tuquita timplu jilirinacaqui tamatača. Ninacžquiztan anaž jakziltami wiñaya timplu jilirž puesto tanzni atchiča. Ninacaqui tjapaž ticža.

²⁴Pero Jesucristuzti wiñaya žetaquiča. Jalla nižtiquiztan wiñayjapa timplu jiliripanž cjequiča, žoñinacžtajapa Yoozquin palt'iziñijapa. ²⁵Jalla nižtiquiztan Jesucristuqui ultimupan wiñayjapa žoñinaca liwriyasača. Jakziltat niž cjen Yoozquin macjataquič niiqui, wiñayjapa liwriita cjequiča. Nižaza Jesucristuqui wiñaya žejtcan liwriita žoñinacžtajapa tirapan Yoozquin pjalt'izinaquiča.

²⁶ Jalla nižta palt'iziñipanž pecčha učumnacaqui. Jalla nii Jesucristuqui Yooz irata zumapankaz kamañchizza. Anaž jakziltami niñquiz tsjii uj tjojnasačha. Niiqui ana zinta ujchizza. Ujchiz žoñinacžquiztan tsjematačha. Arajpachquin Yooztan chica honorchizza. ²⁷ Jesucristuqui parti timplu jilirinaca ana iratačha. Nii parti timplu jilirinacaqui zapuru wilanapan tjaañitačha, persun ujnacquiztanami parti žoñinacž ujnacquiztanami. Jesucristuqui anapan nižta paasačha, ana ujchizza niiqui. Jesucristuqui tsjii wiltapankaz wilana tjaačičha. Wilana cunta niiz persun curpu intirjichičha. ²⁸ Moisés lii jaru ujchiz žoñinacaqui palt'iziñi puestuquiz uchtatačha. Nii liinacquiztan wiruñ Yoozqui tsjii juramento paachičha, niiz Majch palt'iziñi puestuquiz uchjapa. Nii Majchqui Yooz irata zumapankaz kamañchizza wiñajjapa.

EW LII ŽEJLČHA

8 ¹ Weriz chiitanacquiztan jalla tičha chekanaqui, učumnacaltajapa tsjii zuma palt'iziñi žejlčha, Jesucristupacha. Jalla niiqui arajpachquin Yooz Ejpž žew latuquiz julzi žejlčha, Yooz Ejpžtan chica mantican. ² Niičha ultim Yooz kjuychiz jiliriqui, učumnacaltajapa palt'iziñjapa. Nii ultim Yooz kjuy timpluqui anaž žoñiž paatačha. Nižaza anačha tii muntuquiz. Antiz Yooz Jilirž arajpach kjuyapankazza. ³ Zapa timplu jiliriqui niiz puestuquiz kamcan, ofrendanacami wilananacami jalla ninaca tjaañičha. Jalla nižtiquiztan Jesucristo zakaz tsjii tjaažjapa necesičha. ⁴ Jesucristuqui tii yokquizkaz kamñi žoñi cjitasaž niiqui, anaž timplu jilirimi cjitasačha. Tii yokquizpachačha Moisés lii jaru

timplu jilirinaca panž žejlčha. Jalla ninacaqui tirapanž wilana tjaačha Moisés lii jaru. ⁵ Pero ninacaqui ultim Yooz kjuy timpluquiz anaž sirwičha. Arajpachquin žejlčha nii ultim Yooz kjuy timpluqui. Jalla nii timplu cunta tii yokquiz tsjii paata timplu žejlčha tsjii fotožtakaz. Tuqui timpuqui Moisesqui Yooz cjitacama tsjii zkiz timplu paakatchičha. Ima paakatcan Yoozqui niizquiz mantichičha, tuž cjan: “Sinaí curquin amquiz tjeezinčha, jaknužt wejt timpluqui paasztančhalaja, jalla nii. Jalla nii jarupankaz timplu kjuya kjuystančha”. Jalla nuž mantichičha Yoozqui. ⁶ Pero Jesucristuzti žoñinacžtajapa tsjan zumaž palt'izinasačha. Jalla niičha tuquita palt'iziñinacž kamañquiztan juc'ant zuma kamañchizqui. Nižaza tuquita liiquiztan tii anzta liiqui učumnacalta tsjan zumačha. Jesucristuž cjen tii anzta liiqui žejlčha. Nižaza nii liiz jaru tsjii tsjan zuma kamañaqui compromittačha.

⁷ Tuquita tjaata liiqui juc'ant zuma cjitčhaj niiqui, anaž iya liiqui pectasačha. ⁸ Yoozqui tuquita lii jaru kamñi žoñinacžquiz ana zuma naychičha. Jalla nii puntuquiztan Yooz takuqui tuž cjičha:

“Yooz Jiliriqui tuž cjičha: Wiruñta timpuquiztajapa wejrqui tsjii ew lii tjaa-čha Israel wajtchiz žoñinacžquizimi, nižaza Judá wajtchiz žoñinacžquizimi. ⁹ Nii ew liiqui tuquita ejpnacžquiz tjaata liiquiztan tsjemataž cjequičha. Tuquiqui wejrqui ninacž tuquita ejpnaca jwessinčha Egipto yokquiztan. Nii timpuquizpacha wejt lii ninacžquiz tjaachinčha; pero ninacazti wejt lii jaru ana cumplichičha. Jalla nižtiquiztan

wejrqui ninaca jaytichincha. Jalla nuž cjičha Yooz Jiliriqui. ¹⁰Wiruñta timpuquiz Israel žoñinacžtajapa tsjii ew lii tjaa-ačha, jalla tuž: Jalla nii wiruñta timpuquiz wejrqui žoñinacž kuzquiz wejt lii zizkatačha, kuzquiz cjiřtažtakaz. Nekztan wejrpacha ninacž Yooz cjeečha. Nižaza ninacaqui wejt partir žoñinaca cjequičha. ¹¹Jalla nii wiruñta timpuquiz kamñi žoñinacaqui anaž porapat tjaajnarasasačha, ninacž mazinacžquizimi, nižaza ninacž jilanacžquizimi. Anaž tjaajnasachha, “Yooz Jiliržquin paja” cjian. Antiz zapa mayni Yooz Jiliripankaz pajaquičha, tsjii zkoltiquiztanpacha asta pajk žoñicama. ¹²Nižaza ninacž ujnaca pertunačha, wejt okzñi kuzziz cjen. Nižaza ninacž ujnacquitzan tjatznačha wiñayjapa”.

Jalla nuž cjičha Yooz takuqui.

¹³Yoozqui nii ew lii puntuiztan chiižcu nii tuquita lii apatatchičha. Nii tuquita liiqui watchiž cjen, inakazza. Wajilla liwј tјatztaž cjequičha.

YOOZ ZKIZ TIMPLU

9 ¹Nii tuquita liiqui cuzturumpinacchizza, Yooz rispitzjapa. Nii cuzturumpinacaqui tii muntuquiz žejlñi Yooz timpluquizkaz paatatačha. ²Primeraqui zkiz timplu želatčha. Nii timpluquiz pizc kjuya želatčha. Tsjii kjuyaqui ‘Yooztajapa T'akžta Kjuya’ cjitatačha. Nii kjuyquiziqui tsjii pajk candelabra želatčha, nižaza mesa želatčha, Yooztajapa t'akžta t'anta nonzjapa. ³C'uchquin tsjii kjuya želatčha, ‘Yooztajapa Juc'ant T'akžta Kjuya’

cjitatačha. Nii pizc Yooz kjuy taypiquiz tsjii pañ cortina želatčha. ⁴C'uchquin tsjii kor altara želatčha, incienso uјzјapa. Nižaza tsjii caja želatčha, Yooz tjaata lii chojzјapa. Nii cajaqui kjuyltanami zawnctanami koržtan tјajlžtatačha. Nii caj kjuyltan tsjii kor ojch želatčha maná cjita čhјerchiz. Nižaza Aaronž wara želatčha. Nii waraqui ch'ojña c'ajchičha tsjii žejtñi muntižtakaz. Nižaza nii caj kjuyltan Yooz lii cjiřtanaca želatčha. ⁵Nii caj juñtun querubines cjita želatčha anjila irata paata. Nii querubinanacaqui wežlaž cherchi kјarchiztačha; nii caj juntuñ kјara waazitačha. Nižaza nii caj juntuñ lјocžtan tјawkz tabla želatčha, jalla niiqui ujnaca pertunta cјisјapatačha. Jaziqui nii puntunacquitzan ana iya chiiž pecučha.

⁶Jalla nuž tјacžcu timplu jilirinacaqui zawnccuch kjuyquiz luzluzñitačha, lii јaru cuzturumpinaca paacan. ⁷C'uchquin žejlñi kjuyquiz tsjii watquiz tsjii wilta luzñitačha timplu chawјc jiliriqui. Nii alajakaz jalla nekziqi luzasačha. Jalla nuž luzcan wilana conta lјoc chјichñitačha, persun ujnaca pertunta cјisјapami, nižaza parti žoñinacž ujnaca pertunta cјizјapami. ⁸Jalla nižta liiquiztan Espiritu Santuqui zizkatchičha, ima Moisés lii apatatczan, nii Yooz kjuy timpluquiz paaz cuzturumpinacaqui walatčha, nii. Nižaza jalla nuž walan čhјul žoñimi anapan c'uchquin luztačha. ⁹Nii tuquita liiqui Yooz puntunaca chiičha tii timpuquiz kamñi žoñinacžtajapa. Nii lii јaru žoñinacaqui ofrendanacami wilananacami tјaachičha. Jalla nuž tјaachiž cјenami nii žoñinacaqui Yooz yujcquiz ana uјchiz nižaza zuma kuzziz ultimu ana cјiskatta cјesačha. Ninacaqui tirapan uјchiztačha. ¹⁰Jalla

nii tuqita cuzturumpinacaqui jalla tižtakaztača: čheri tjaazmi, licz tjaazmi, kjaztan ajunzmi. Jalla nižta cuzturumpinacaqui žoñž curpu zawnctankazza. Jalla nuž cjenami lii campiizcama nii cuzturumpinacaqui walatča.

¹¹Wiruñ nekztan Cristuqui tjončiča. Jazic niiča Yooz timplu chawjc jiliriqui; Yooz zumanaca tjaazjapa tjončiča. Timplu chawjc jiliri cjican Yooz kjuyquiz sirwiča. Anaž tii yokquiz paata Yooz kjuyquiz sirwiča. Antiz arajpachquin Yooz ljiitum kjuyquin sirwiča. Jalla niiča ultim Yooz kjuya. Tii yokquiz paata Yooz kjuyquiztan juc'ant zumača. ¹²Cristuqui arajpachquin ultim Yooz kjuyquiz luzziča. Jalla nuž luzcan ana cabranacž ljocmi nižaza ana vac toronacž ljocmi chjitchiča. Antiz persun ljocžtan luzziča, žoñinaca wiñaya liwriita cjisjapa. Jalla nuž persun ljocžtan tsjii wiltakaz luzziča tjapa tižtajapa. ¹³Tuqita liiqui tužutača: Cabranacž ljocžtanami, vac toronacž ljocžtanami ujchiz žoñinacžquiz tjawkñitača. Nižaza ujta vacanacž kjupžtan ujchiz žoñinacžquiz llump'aczt'iñitača. Jalla nižta cuzturumpinaca zawnctankazza; ana poderchiztača, ana ujchiz cjskatzjapa. ¹⁴Cristuž ljocžti ancha juc'anti poderchizza. Nii ljocž cjen žoñinacž kuznacaqui zuma cjskatasacha. Wiñay žejtñi Espíritu Santuž cjen Cristuqui tsjii zuma wilana cunta persunpacha ticziča. Ana ujchiz cjican, nižž ljoc Yoozquin tjaachiča, ujchiz žoñinaca pertunta cjisjapa. Jalla nižtiquiztan Cristuqui žoñinaca liwriyasacha. Cristuž cjen nii liwriita žoñinacaqui ninacž tuqita ana zuma kamañanaca jaytasacha, nižaza zuma kamañchiz Yoozquin sirwasacha.

¹⁵Jalla nižtiquiztan Jesucristuž cjen Yoozqui ew lii ut'aychiča, žoñinaca ultimu liwriita cjisjapa. Žoñinacaqui primer lii mantuquiz cjican, ujnaca paañitača. Pero Jesucristuqui ticziča, nii paata ujnacquiztan liwriizjapa. Jalla nižtiquiztan jakziltat Yooz kjawžta cječhaja, jalla niiqui Yooz compromitta irinsa tanznaquiča; jalla niiqui wiñayjapa Yooztan chica kamaquiča. ¹⁶Tsjii žoñiqui testamento paachiž cjen, nižž cuzazanaca tanñi žoñinacžquiz ut'ayča. Pero ticžtankaz nii testamentuqui walča. ¹⁷Nii testamento paañi žoñiqui tira žetan, nii testamentuqui anaž walča. Antiz ticžtan, jalla nekztanž nii testamentuž walasacha. Ticžtankaz nižž cuzazanaca tanñi žoñinacaqui ultimu nižž cuzazanaca tanznasača. ¹⁸Jalla nižtiquiztan tuqita liiqui ut'aytatača, conta animal ljocžtan. ¹⁹Moisesqui tjapa Yooz mantita liinaca kjanapacha paljayžcu nii liinaca ljocžtan ut'aychiča. Moisesqui tsjii chupic choma tanžcu, hisopo cjita parquiz tjerchiča. Nekztan ljocžtan kjaztan t'ajžcu, jalla nekz nii para ch'iižcu, sucarpayñitača, žoñinacžquizimi, liichiz libruquizimi. ²⁰Jalla nuž sucarpaycan, Moisesqui tuž cjichiča: Tii ljocqui Yooz mantita liinaca walkatča ančhucaltajapa. ²¹Jalla nižtazakaz Moisesqui nii ljocžtan Yooz kjuyquizimi, Yoozquin sirwiz cuzazanacquizimi sucarpayñitača. ²²Nii tuqita lii jaru jos tjapa cuzazanaca sucarpayñitača, Yooz yujcquiz zuma cjisjapa. Ljoc ana tjawkžcu ujnaca ana pertunta cjesacha.

JESUCRISTUQUI ŽOÑINACŽ LAYCU TICZIČHA

²³Tuqita lii jaru nii Yoozquin sirwiz cuzazanacaqui Yooz yujcquiz wali

cjisjapa jalla nižta cuzturumpinaca paastantača. Tii yokquiz žejlñi cuzazanacaqui fotožtakazza. Anača arajpachquin ultimu želasächa. Arajpach Yooz zuma kamañchiz cjiskatzjapa, nii animal ljocnacaqui anaž atasächa. ²⁴Cristuqui persun ljocžtan ana žoñiž paata timpluquiz luzziča. Arajpach Yooz kjuyquizpacha luzziča. Jalla nicju anziqui niiča učhumnacaltajapa Yoozquin palt'iziñiqui. Tii yokquiz žejlñi timpluqui tsjii fotožtakazza nii werar arajpach Yooz kjuyquiztan. ²⁵Zapa wata timplu chawjc jiliriqui animalž ljocžtan Yooz kjuyquin luzñitača. Ana persun ljocžtan luzñitača. Pero Cristuqui tsjii wiltapanikaz wilana cunta cjissiča, ana wilta wilta. ²⁶Wilta wilta wilana cunta ticztasaž niiqui, tii muntu kalltiquiztanpacha wilta wilta sufrican ticztasača. Tuquita timpu tucuzinta cjiscu tsjii wiltakaz Jesucristuqui parizquichiča. Nekztan niiz ljoc tjawkžcu ticziča, tjapa ujnacquiztan žoñinaca liwriizjapa. ²⁷Tjapa žoñinacaqui tsjii wilta ticstanča tii yokquiz. Jalla nekztan pjalžta cjequiča, Yooz yujcquiz zuma, anazuma, nii. ²⁸Jalla nižta irata Jesucristuqui tsjii wilta tii yokquiz ticziča, wacchi ujchiz žoñinacž laycu. Pero wiruñ wilta tii muntuquiz tjonaquiča. Nekztan žoñinacž ujnacquiztan ana ticznaquiča. Antiz niizquiz tjapa kuz tjewzñi žoñinaca ultimu liwriyaquiča.

MOISES LIQUI PJALTIČHA

10 ¹Moisés liqui Yooz zumanaca tsjii kolucullakaz tjeeziča. Ana ultimu kjana tjeeziča. Nii liiqui tuž cjiča: Wiruñ tjapa Yooz zumanaca tjonaquiča, jalla nii. Nižaza nii liiqui anaž ultimpacha Yooz yujcquiz

zuma cjiskatasächa, Yoozquin macjatñi žoñinacžquiziqui. Nii lii jaru watay wata wilanakaz contača. Jalla nuž paažcumi, žoñinacžquiz anaž ultimpacha Yooz yujcquiz zuma cjiskatta cjesächa. ²Nii lii jaru paacan, žoñinacaqui ultimpacha Yooz yujcquiz zuma cjiskattasaž niiqui, anapanž wilana tira onantasächa. Nii wilana tjaañi žoñinacaqui ultimu ana ujchiz cjitasaz niiqui, zumapan cjitasächa, nižaza persun kuzquiz ana iya cjuñtasača čjul ujquiztanami. ³Pero nii wilana tjaaž liiqui watay watapanž ujnaca cjuñkatča. ⁴Vac toronacž ljocmi cabranacž ljocmi tjaatiquiztanami anapanž ujnacquiztan liwriyasača.

⁵Jalla nižtiquiztan Cristuqui tii muntuquiz tjonžcu Yooz Ejpžquin tuž cjičiča:

“Amqui animal wilananacami ofrendanacami ultimu ana pecasača. Antiz wejtajapa žoñž curpu tjaczinchamča, žoñinacž ujnac laycu ticzjapa. ⁶Ujta animalanacami uj paatiquiztan tjaata ofrendanacami ultimu am ana cuntintu cjiskatasächa. ⁷Jalla nižtiquiztan wejrqui cjichinča: Wejt Yooz, tii muntuquiz tjonchinča, am kuzcama paazjapa. Jaknužt wejt puntuquiztan Yooz tawk liwruquiz cjiirtažlaja jalla nii cumplizjapa tjonchinča”.

⁸Jesucristuqui cjičiča, “Yooz Ejpqui anaž pecča nižaza anaž justazza jalla tinaca: animal wilananacami, ofrendanacami, nižaza ujta animalanacami, nižaza uj paatiquiztan tjaata ofrendanacami. Tuquita liiqui nižtanaca tjaaž mantichiča. Jalla nuž mantita cjenami, Yoozqui anaž niikaz ultimu pecča”. ⁹Nekztan Jesucristuqui

cjchizakazza: “Yooz Tata, wejrqui tii muntuquiz tjonchinča, am kuzcama kamzjapa”. Jaziqui Jesucristuqui nii tuquita liinaca apatatskatchičha, nii lii cuzturumpinacžtanpacha. Nekztan ew lii ut'aychīcha. Nii lii jaru Jesucristuqui wilana cunta intirjitatača. ¹⁰Yooz kuzcama kamcan Jesucristuqui tsjii wiltakaz persun curpu wilana cunta intirjichiča, žoñinacž ujquiztan ticzjapa. Jalla nižtiquiztan Yoozqui učumnacaquiz zuma kamañchiz cjiskatchičha.

¹¹Timplu jilirinacaqui zapuru ninacž puestuquiz atintichiča. Zapuru wiltan wiltan wilananaca Yoozquin tjaañitača. Pero nižta wilananacaqui ujnacquiztan anapan žoñinaca liiwriyasača. ¹²Jesucristuzti tsjii wiltakaz persun curpu wilana cunta intirjichiča, žoñinacž ujquiztan ticzjapa. Jalla nuž ticžcu, arajpachquin Yooz Ejpž zew latuquiz julziča, nižtan chica mantiñi cjisjapa.

¹³Jalla nicju tjewžcan žejlča, niž quintranaca liw atiptacama cjisjapa, niž kjojch koztan tječtažtakaz.

¹⁴Jalla nuž žoñinacžtajapa tsjii wilta ticžcu, Jesucristuqui Yooz partiquiz žejlñi žoñinacžquiz wiñayjapa Yooz yujcquiz ancha zuma cjiskatchičha.

¹⁵Nižaza nii puntuquiztan Espiritu Santuqui chiiča, tuž cjan:

¹⁶“Tuquita lii apatatžcu, wejrqui žoñinacžquiz tsjii ew lii tjaača. Jalla nuž cjiča Yooz Jiliriui. Wejrqui ninacž kuzquiz wejt liinaca zizkatača, nižaza intintazkatača”.

¹⁷Nekztan cjichizakazza:

“Ninacž paata ujnaca ana iya cjuñznača. Nižaza ninacž ana wali cjicjitanacami liwjtjatznača. ¹⁸Jalla nižta ujnacquiztan pertuntažlaj

niiui, ana iya čjul wilanami pecasača”.

YOOZQUIN MACJATSPANŽ WAQUIZİCHA

¹⁹Jilanaca, cullaquinaca, jaziqui Jesucristuž ticziž cjen učumqui ana jiwjatcan Yooz yujcquiz luzasača. ²⁰Ew kamañchiz kamcanaqui ana jiwjatcan Yooz yujcquiz luzasača. Jalla nii ew kamañqui Jesucristuž tjaatača. Persun curpu wilana cunta tjaažcu, Jesucristuqui arajpachquinpacha Yooz yujcquiz luzziča, nii c'uchquin žejlñi cortina cjetžtažokaz. ²¹Jesucristučha Yooz kjuychiz žoñinacžtajapa Yoozquin palt'iziñiqui. Jaziqui učumnacaltajapa palt'izinaquiča. ²²Jalla nižtiquiztan tjapa kuztan Yoozquin macjatz waquiziča. Nižaza Jesucristužquin kuzziz cjen ana jiwjatcan Yoozquin macjatz waquiziča. Jesucristuqui učumnacaž paata ujnaca pertunchiča, učumnac kuzquiz ana iya u cjuñzjapa. Nižaza učum curpunacaqui tsjii zuma kjaztan awjtažokazza. ²³Yoozquin macjatžcu Yooz famillquiz luzzinčhumča. Jaziqui ana jiwjatcan tirapan Yoozquin tjurt'ichi kuzziz cjequiča. Nekztan Yooztan chica kamaquiča. Nii Yooztan kamzqui, jalla nii Yoozqui učumnacaquiz compromitchiča. Nižaza nii compromitchi Yoozza taku cumpliñiqui. ²⁴Jalla nižtiquiztan Yooz kamañquiz kamcan porapat zumpacha p'ekinchayasa, zuma munaziñi kuzziz cjisjapa, nižaza zuma obranaca paazjapa. ²⁵Nižaza yekjap criichi žoñinacaqui zapa domingo ana ajcajczñiča. Ana nižta irata kama. Antiz učumqui porapat zumpacha p'ekinchayasa, zuma kamzjapa.

Jesucristuž tjonz tjuñi žcatžinžquičha. Jalla nižtiquiztan juc'anti učumqui porapat p'ekinchayastančha.

²⁶ Werar Yooz taku catokžcupacha nekztan kuzinpan Yooz quintrá quepsnaquiz niiqui, ana pertunta cjesačha. ²⁷ Pero nižta cjcijñinacžquiz Yoozkaz casticaquičha. Yoozqui niž quintranaca wiñaya casticaquičha infiernuquin. ²⁸ Jakziltat Moisés lii ana cazzi cjitčhaja, nižaza pucultan čhjepultan testicunaca nii ana caztá puntu declartčhaja, jalla nekztan nii uj paañi žoñiqui ana okžcu conzpanikaztačha. ²⁹ Jalla nižtiquiztan jakziltat Yooz Majch quintrapan quepsnačhaja, nižaza Yooz Majch liwriiñi ljoc tjawkta puntuquiztan iñaračhaja, nižaza okžñi Yooz Espíritu Santužquiz žawjwa zjijcčhaja, jalla nižta paañinacaqui juc'anti castictaž cjequičha, nii Moisés lii quintrá paañi žoñinacžquiztan cjen. Jalla nižta casticzpan waquizičha nižta žoñinacžtaqui. ³⁰ Učhum pajta Yooz Jiliriqui tuž cjichičha: “Wejrtčha castiquiñtqui. Wejrqui žoñinacžquiz casticačha, ujnaca paatiquiztan jama”. Jalla nuž cjichičha Yooz Jiliriqui. Nižaza Yooz takuqui tuž cjičha: “Yooz Jiliriqui niž kjuychiz žoñinacž paatanaca pjalznaquičha”. ³¹ Jakziltat Yooz quintrapan kamchižlaja, jalla niiqui werar žejtñi Yooziž tantaž cjequičha. Jalla nuž Yooz tantaž cjequiz niiqui, nižtanacžquiz ancha ana waliž cjequičha.

³² Ančhucaž Yooz famillquiz luztaž cjuñzna. Paljayta Yooz taku catokžcu, ančhucqui pasinziz kuztan ancha sufrichinčhucčha, quintranaca ancha žejlčhiž cjen. ³³ Yekjap ančhucqui ch'aanitatačha, nižaza wjajttatačha tjapa žoñinacaž cheran. Nižaza yekjap ančhuca jilanacaž nižta sufran,

ančhucqui “Jesalla, wejt jilačha niiqui” cjican declarchinčhucčha. ³⁴ Ančhucqui tsjii criichi žoñinaca preso tanta cjen okžñi kuztan yanapchinčhucčha. Nižaza ančhucaž cusasanaca kjañta cjenami, cuntintu kuzziz žejlchinčhucčha. Arajpachquin ančhucaltajapa juc'ant zumanaca žejlčha, wiñayjapa tjurñi. Jalla nii cjuñžcu, ančhucqui cuntintu kuzziz žejlchinčhucčha. ³⁵ Tjurt'ichi kuzziz cjican, jalla nii zuma kuzquiztan ana jayta. Ticzama tjurt'ichi kuzziz cjequiz niiqui, Yoozquiztan pacta cjequičha juc'ant zumanacžtan. ³⁶ Ančhucqui pasinziz kuzziz cjee, Yooz kuzcama zuma kamzjapa. Jalla nekztan ančhucqui Yooziž compromitta zumanaca tanznaquičha. ³⁷ Yooz takuqui tuž cjičha:

“Wajilla nii tjonñiqui tjonaquičha, anaž ancha ažk katasačha.

³⁸ Jakziltat wejtquiz kuzziz cjen wejt yujcquiz ana ujchiz cječhaja, jalla niiqui arajpachquin wejttañ chica zumapan kamaquičha. Pero jakziltat wejt quintrá quepačhaja, jalla nii žoñičha ana waliqu. Niižtan ancha anal jutzazučha”.

³⁹ Pero učumnacačha anapan Yooz quintrá quejpzñiqui. Jalla nuž quejpznasaž niiqui, Yooziž ancha ana waliž castictaž cjequičha. Antiz učumčha tirapan Yoozquin kuzzizqu. Jalla nuž kamcan učhum persun animu zumaž čhjelinčha, liwriita cjisjapa.

YOOZQUIN KUZIZ ŽOÑINACA

11 ¹ Yoozquin kuzziz cjen, učumqui ultimupan zizza, Yooz taku cumplitapanž cjequičha, jalla nii. Nižaza Yoozquin kuzziz cjen učumqui zizza, anzta timpuquiz ana

cheržcumi Yooz žejlpanča, nižaza Yooz zumanaca ultimupan žejlča, nii. ²Učhum tuquita atchi maa ejpnacaqui Yoozquin kuz tjaachiča. Jalla nuž Yoozquin kuzziz cjen Yoozqui ninacž puntuquiztan “Zumača ninacaqui” cjichiča.

³Yoozqui tawkžtankaz chiican tii muntu paachiča. Yoozquin kuzziz cjen jalla nii zizza, ultim werara jalla nužupan paata, jalla nii. Yoozqui ana chertanacquiztan tii muntuquiz žejlñinaca paachiča.

⁴Yoozquin kuzziz cjen Abelqui tsjii zuma ofrenda wilana Yoozquin tjaachiča. Cainžquiztan juc'ant zuma ofrenda Yoozquin tjaachiča. Abelž Yoozquin kuzziz cjen, Yoozqui Abelž tjaata ofrenda risiwchiča. Nižaza Abelž puntuquiztan Yoozqui chiichiča “Zumača niiqui” cjican. Abel ticziž cjenami učhumqui zizza, niiqui Yoozquin zuma kuzziztača, jalla nii. Jalla nii zizcuqui učhumqui Abelž zuma kamaña yatekasa.

⁵Yoozquin kuzziz cjen Enocqui arajpachquin ana ticzi chjichtatača. Ana iya tii muntuquiz žejlchiča. Yoozpantača chjitchi. Yooz takuqui Enocž puntuquiztan tuž cjiča: Ima arajpachquin chjichtaž cjen, Yoozqui Enoc zuma kamañquiztan cuntintu cjissiča. Jalla nuž cjiirtača Yooz taww liwruquiz. ⁶Jakziltat ana Yoozquin kuzziz cječhaja, jalla niižquiztan Yoozqui anapanž cuntintu cjesača. Jakziltat Yoozquin macjatz pecčhaja, jalla niiqui criistanča, Yoozqui žejlča, jalla nii. Nižaza criistanča, Yoozqui niižquin macjatz pecni žoñinacžquiz zumanaca tjaaquiča, jalla nii. Jalla niža criichi žoñžquiztan Yoozqui cuntintuča.

⁷Nižaza Yoozquin kuzziz cjen Noequi kjaz juyzuquiztan liwriitatača.

Ima kjaz juyzu tjonan Yoozqui Noežquiz chiižinchiča, “Kjaz juyzul cuchanzcača”, cjican. Jalla nii Yooz chiižintaqui Noequi catokchiča. Nekztan Yooz chiita jaru tsjii pajk warcu kjuya irata kjuychiča, niiž familianacžtanpacha liwriita cjisjapa. Jalla nuž Yoozquin kuzziz cjen Noequi tjeeziča, parti žoñinacaqui ancha ujchizza, jalla nii. Nižaza Yoozquin kuzziz cjen Noequi Yooz zuma kamaña tanchiča, tsjii irinsažtakaz.

⁸Nižaza Abrahamqui Yoozquin kuzziz cjen, Yooz mantita ana jayrazcu cazziča. Yoozqui Abrahamžquiz cuchanzjapa kjawziča, yekja yokquin okajo. Nižaza Yoozqui Abrahamžquiz tuž cjichiča: “Wiruñ wejrqui amquiz nii yoka tjaača, irinsa cunta”. Yooz mantita jaru ojkičiča. Jakziquin ojktčhaja, jalla nii ana zizatča. Jalla nuž cjenami Abrahamqui Yooz taww jaru ana jayrazcu ojki želatča.

⁹Abrahamqui Yoozquin kuzziz cjen Yooz mantitacama nii Yooz tjeežta yokquiz kamchiča. Yekja žoñž yoka cjenami, Yoozqui Abrahamžquiz nii yoka compromitchiča, “Wiruñ tii yoka amta cjequiča”, cjicanaqui. Jalla nii yokquizpacha kamcan, zkiz kjuy tultunacchiz kamñitača Abrahamqui. Jalla niža zakaz Isaacžtan Jacobžtan zkiz kjuychiz kamñitača. Nii pucultanaqui Abrahamž irata tjewwizakazza Yooziž chiita taku cumpliscama. ¹⁰Ultimu Abrahamqui arajpach wajtquin ojcz tjewziča, wiñaña tjurñi watja. Yoozqui nii zuma watja pinsichiča, nižaza paachiča. Jalla nii zuma wajtquin ojcz tjewziča Abrahamqui.

¹¹Nižazakaz Sarqui Yoozquin kuzziz cjen ica cjissinča, chawcwa cjicanpacha. Tsjii majchchiz cjissinča, Yoozquin criichiž cjen.

Sarqui tantiichincha, Yoozqui niiz compromitta taku panž cumplisnaquicha, nii. ¹²Jalla nižtiquiztan Abrahamqui ticz irarchiz cjenami tsjii majchchiz cjissicha. Jalla nii majchquiztan walja tama mirchiča, walja tama arajpach warawaranacažtakaz nižaza walja tama kot at pjilanacažtakaz, jalla niža mirchiča. Ancha tamaž cjen, anača kanchuca Abrahamžquiztan tjonni majch maatinaca.

¹³Tjapa nii žoninacaqui, Abelžtan Enocžtan, Noežtan, Abrahamžtan, jalla ninacaqui ticziča ima Yooz compromitta taku cumplisn. Jalla nuž cjenami Yoozquin tirapan kuzziztača. Yoozquin kuzziz cjen ninacaqui zizziča, Yoozqui niiz taku wiruñtajapa panž cumplaquicha. Jalla nuž kuzquiz zizcu cuntintutača. Tii muntuquiz žejlan ninacaqui “Yekja wajtchiz žoñtča”, cjiñitača. ¹⁴Jalla niža chiiñinacaqui kjanapacha tjeēža, ninacaqui arajpach wajtquin ojcz pecchiča, nii. ¹⁵Ninacaž ulanžquita yoka cjuñtasaz niiqui, nii yokquin cuttiñi attasača. ¹⁶Ninacazi tsjan cusa yokaž pecatča, arajpach yokquin irantiz pecatča. Jalla nižtiquiztan Yoozqui anaž azkatča, ninacaž “Wejt Yooza”, cjican cjenauqui. Yoozqui ninacžtajapa tsjii zuma watja tjacžinchiča.

¹⁷Nižaza Abrahamqui Yoozquin kuzziz cjen tjapa Yooz mantitanacami cumpliñitača. Yoozqui Abraham yanziča, ultimu Yoozquiz kuzziz, ana ultimu Yoozquiz kuzziz, jalla nii. Jalla nuž yanzjapa Yoozqui Abrahamžquiz mantichiča, niiz zinta majch wilana cunta tjaakatjapa. Nii zinta majchqui Isaac cjitatača. Nekztan Abrahamqui niiz zinta majch wilana cunta conijochiča. Nekztan

conzmayatača. Pero Yoozqui nii konz apatatskatchiča, Abrahamž zuma cazni kuz zizcu. Niiž tuquiqui Yoozqui Abrahamžquiz cjichiča: ¹⁸“Isaacž cjen amqui majchmaatinacchiz cjequicha”. Jalla nuž taku tjaachi cjenami Abrahamqui niiz zinta majch wilana cunta conijochiča. ¹⁹Abrahamqui persun kuzquiz tantiichiča, Yooza ticzinacami jacatatskatñiqui, jalla nuž tantiyatča. Abrahamqui persun kuzquiz persun majch konz cjichipantača. Jalla nižtiquiztan Isaac majchqui ticziquiztan jacatatchižtakaz cjissicha.

²⁰Nižaza Isaacqui Yoozquin kuzziz cjen Jacobžtan Esaužtan, jalla ninacžquiz mazinchiča, wiruñtajapa ninacžta zumanaca cjequicha, nižaza Yooz yanapta cjequicha, jalla nii. ²¹Nižaza ticz ora Jacobqui Yoozquin kuzziz cjen Josež maatinacžquiz mazinchiča, Yoozqui ninacžquiz zumanaca tjaaquicha, jalla nii. Nižaza Jacobqui atztan tjurt'ižcu Yoozquin rispitchiča. ²²Nižaza Josequi Yoozquin kuzziz cjen ticz ora mazinchiča, Israel žoninacaqui Egipto yokquiztan ulnaquicha, nii. Nižaza mantichiča, persun curpu tsjiñnaca Egipto yokquiztan chjichajo.

²³Nižaza Moisés maa ejpqui Yoozquin kuzziz cjen Moisés nastiquiztan čhjep jiiz chjojziča. Ninacaqui cherchiča, ancha c'achja nii wawa, jalla nii. Tuquiqui Egipto chawjc jiliriqui mantichiča, tjapa Israel lucmajch wawa contaj cjila, nii. Pero Moisés maa ejpqui Yoozquin kuzziz cjen nii chawjc jiliriz mantita ana eksiča. Moisés wawa ana conchiča. ²⁴Nekztan Faraon chawjc jiliriz majtqui nii Moisés wawa uywassinča. Jalla nuž uywastiquiztan nii wawaqui pajkchiča. Jalla nekztan

pajkžcu Moisesqui Yoozquin kuzziz cjen Faraonž maati cunta cjis anapan pecatčha. ²⁵Antiz Moisesqui Yooz illzta Israel žoñinacžtanpacha sufritz tantiichičha, uj paañi žoñinacžtan tsjii ratukaz cuntintu žejlz cjenpacha. ²⁶Niiz kuzquiz tantiichičha, “Egipto cusasanacžtan cuntintu kamz cjenpacha, Cristužtajapankaz sufrasachha. Jalla nuž sufrichi kamchiž cjen ultimquiziqui juc'ant cusal cjeečha, ricachu kamzquiztan”. Jalla nuž cjican, Moisesqui Yooz compromitta zumanac kjutñi pinsatčha. ²⁷Nižaza Moisesqui Yoozquin kuzziz cjen Egipto yokquiztan ulanchičha, chawjc jilirž žawjta ortina ana ekskcu. Niiž kuzquiz tantiita jaru tjurt'ichi žejlchičha, niiž kuztan Yooz cherchiž cjen.

²⁸Nižaza Moisesqui Yoozquin kuzziz cjen Yooz mantita jaru zapa kjuyquiz pascua wilana conz mantichičha. Nekztan nii wilan ljocžtan zapa kjuy zanquiz sucarpayz mantichičha Israel žoñinacž primer maatinaca ana conta cjisjapa, ticzkatñi anjilžquiz. ²⁹Nekztan Yoozquin kuzziz cjen Israel žoñinacaqui Mar Rojo cjuta pajk kota kajkchičha, kjoñ yokažtakaz. Nekztan Egipto quintra žoñinacaqui nii kjoñiranpacha nii pajk kota zakaz kakatčha. Jalla nuž taypiquiz kajkžcan tjapa nii Egiptonacaqui kjazquiz ticzičha.

³⁰Yoozquin kuzziz cjen Israel žoñinacaqui Jericó wajt muytata žejlñi pirkanaca pajlkatchičha, pakallak tjuñi muytata ojklayžcu. ³¹Nižaza Yoozquin kuzziz cjen Rahabqui ana ticzinčha parti Jericó wajtchiz žoñinacžquiztan. Naaqui Israel wajtchiz awayt'iñinaca zuma risiwchinčha. Jalla nižtiquiztan ana ticzinčha. Tuquiqui putirii žoñtačha. Nekztan Yoozquin kuz tjaachinčha. Pero parti Jericó wajtchiz

žoñinacaqui Yooz mantita ana cazzičha, werar Yoozquin ana kuz tjaachičha.

³²Yoozquin kuzziz puntuquiztan iya quintunaca žejlčha. Pero timpuž pjaltičha. Jalla nižtiquiztan ana chii atasachha Gedeónž puntu, Baracž puntu, Sansónž puntu, Jeftéz puntu, Davidž puntu, Samuelž puntu, nižaza profetanacž puntu. Jalla nii Yoozquin kuzziz žoñinacž quintunaca žejlčha pero. ³³Ninacaqui Yoozquin kuzziz cjen quintra žoñinaca atipchičha, nižaza zuma mantiñi cjissičha, nižaza Yooz compromitta taku tanzičha, nižaza ana wal leonanacž atanaca chawcžinchičha. ³⁴Nižaza ana wal uj asñinaca tjessinchičha, nižaza atipchičha, ninaca ana pajk cuchillžtan conta cjisjapa. Nižaza ana azziz žoñinacaqui azziz cjissičha Yoozquin kuzziz cjen. Nižaza quira zalcan walja azziztačha, jalla nižtiquiztan quintra žoñinaca tjiranchičha. ³⁵Yoozquin kuzziz cjen Yoozqui yekjap maatakanacžtajapa ticzinaca jacatatskatchičha.

Yoozquin kuzziz cjen yekjap žoñinacazti sufriskatačha. Pero ninacaqui ana Jesucristo nicchičha, sufrisquiztan liwriita cjisjapa. Antiz tirapan tjurt'ichičha, ticz cjenami. Jalla nuž ticzičha, jacatatžcu juc'ant zuma kamañchiz cjisjapa. ³⁶Yekjap žoñinacaqui Yoozquin kuzziz cjen iñartatačha. Nižaza wjajttatačha. Nižaza carinžtan moktatačha. Nižaza carsilquiz chawctatačha. ³⁷Nižaza Yoozquin kuzziz cjen yekjap žoñinacaqui maztan čhajčcu contatačha. Nižaza yekjapanacaqui taypiquiz pootžcu contatačha. Yekjapanacaqui sufriskattatačha, werar Yoozquiztan quejpskatajo. Pero nii criichi žoñinacaqui ana quejpsičha. Yekjapanacaqui Yoozquin kuzziz cjen

cuchillžtan contača. Yekjapanacaqui Yoozquin kuzziz cjen uuzi zkizimi cabra zkizimi cujtžta ojklaychiča. Ana iya zquitchiztača. Nižaza Yoozquin kuzziz cjen yekjap žoñinacaqui t'akjiri kamcan awantichiča; yekjapanacaqui ancha sufrisnaca awantichiča; yekjapanacaqui chjojritžtapan awantichiča. ³⁸ Ana criichi žoñinacaqui nii Yoozquin kuzziz žoñinacžtan ana kamz waquiziča. Ana criichi žoñinacaqui ana zumapanča. Nii Yoozquin kuzziz žoñinacazti ancha zumača. Jalla nuž cjenami tii muntuquiz sufrican awantichiča, ch'ekti yokaran ojklaycan, curunacaran ojklaycan, maz pjet ajkquiz kamcan, nižaza yok pjetquiz kamcan. ³⁹ Tjapa ninacaqui Yoozquin kuzzizpantača. Jalla nižtiquiztan Yoozqui ninacž puntuquiztan ticlarchiča, “Ninacača wejtquin kuzzizqui” cjicanaqui. Jalla nuž cjenami, Yooziž compromitta taku ninacžtajapa ima cumplissiča. Yooz taku cumplitaqui ana tanzichiča. ⁴⁰ Učhumnaca cjuñžcu, Yoozqui juc'ant zumanaca pinsichiča. Jalla nižtiquiztan ninacžtanami učhumnacatanami chicapacha, nižaza tjapa Yoozquin kuzziz žoñinacaqui Yooz irata ancha zuma kamañchiz cjequiča.

YOOZ KAMAÑCHIZ CJEE

12 ¹ Yoozquin kuzziz žoñinaca, jaziqui wacchi tuquita žoñinacaqui učhumnacaquiz tjeeziča, Yoozquin kuzziz kamaña, jalla nii. Ninacaqui učhumnaca muytatažtakazza. Ninacž zuma kamaña cjuñžla. Jalla nektzan tjapa anawalinaca paaz jaytila nižaza kuzquiz tjapa anawali pinsiskatñinaca ecla. Nekztan Yooziž tjaata kamañquiz

tjurt'iñi pasinziz kuztan kamla. ² Nižaza učhumqui Jesucristuž kamaña cjuñžla. Niiž cjen učhumqui Yoozquin kuz tjaachinčhumča. Nižaza niiqui učhumnacaquiz juc'ant Yoozquin kuzziz cjiskataquiča, ancha zuma Yooz kamañchizkaz cjisjapa. Jesucristuqui cruzquiz ticzcan sufrichiča. Cruzquiz ticzqui azzucatača. Pero Jesucristuqui ana turwayziča nii ticzjapa. Jalla nižtiquiztan arajpachquin Yooz žew latuquiz julzi žejlča, cuntintu. Jalla nuž cuntintu žejlz zizcu, nii sufrisnaca awantichiča.

³ Jesusaž kamta cjuñžna. Niiqui ujchiz žoñinacž kjarquiz ancha sufrichiča. Jalla nii Jesusaž kamta cjuñžcu Yooz kamañchiz kamcan anapan ocha, tjup kuzziz cjee. ⁴ Ančhucqui imaziž contača ujchiz žoñinacaž ančhucacquiz walja sufriskatanami. ⁵ Yoozqui ančhucacquiz chiižinchiča, niiž maatinacaztakaz. Jalla nii ewjt'iñi chiižinta ana tjatzna. Yooz takuqui tuž ančhucacquiz chiižinča:

“Wejt maati, Yooz Jiliriž ewjt'iñi chiižinta ana chjaya. Nižaza niižquiz casticta cjenami ana llajlla kuzziz cjee. ⁶ Yooz Jiliriqui niiž k'aayi maatinaca ewjt'iča; nižaza persun maatinaca azquichñi casticu tjaaža, wilta zuma cjićiyajo”.

⁷ Jalla nižtiquiztan ančhucqui pasinziz kuztan Yooz azquichñi casticu awanta. Yooz Ejpqui ančhucacquiz irpiča. Tjapa ejpnacaqui persun maatinacapanž ewjt'iča. ¿Tsji ana nižta ewjt'iñi ejp želasajo? Anaž cjesača. ⁸ Jaknužt Yoozqui tjapa niiž maatinaca ewjt'ičhaja, jalla nižta Yoozqui ančhuc ewjt'izakazza. Ančhucqui ana ewjt'ita cjitasaž niiqui,

ana lijitum Yooz maatinaca cjitasača. Ančhucqui pamparan maatinacažtakaz cjitasača. Ana ultim Yooz famillchiz žoñinaca cjitasača. ⁹ Ančhuc cjuñzna, ocjala cjcanaqui ućhum persun maa ejpqui ewjt'iñitača. Nižaza ninacžquiz rispitchinćhumtača. Jalla nižtiquiztan žoñi paañi Yooz Epiž ewjt'itaqui juc'anti catokz waquiziča, zuma kamañchiz kamzjapa. ¹⁰ Ućhum persun maa ejpqui tsjii timpujapakaz ućhumnacaquiz ewjt'ichiča, ninacaž tantiitacama. Yooz Ejpzi ućhumnacaltajapa ewjt'iñiča, ućhum tsjan zuma kamañchiz cjisjapa, niž irata ancha zuma cjisjapa. ¹¹ Azquichñi casticunacquiztan ućhumqui sufrićhumča. Casticz ora llaquita kuzzizćhumča. Pero jakziltat castictiquiztan tsjan zuma kamañchiz cjissižlaja, jalla niiqui ultimu cuntintu cjisnaquiča. Nižaza zuma kuzziz Yooz kuzcama kamaquiča.

YOOZQUIN TJAPA KUZ CJISPANČHA

¹² Jalla nižtiquiztan ančhucqui wilta azi tanzna, zuma kamzjapa. Kjaranacami owanacami otchižtakazza. Tjup kuzziz cjee, zuma kamzjapa. ¹³ Yooz jiczquiz zuma ojklaya. Jalla nekztan anazuma ojklayñi žoñinaca zuma kamañquiz irpita cjesača. Ančhucaž zuma kamtiquiztan ninacaqui zuma kamañchiz cjisnaquiča.

¹⁴ Nižaza tjapa žoñinacžtan zumapanž kamzjapa tjapa kuz tjaa. Nižaza Yooz irata ancha zuma kamañchiz kamzjapa tjapa kuz tjaa. Ana zuma kamañchiz cjequiz niiqui anaž Yooz Jiliržtan kamasacha. ¹⁵ Yoozqui ančhucaquin yanapz pecča. Nii zuma yanapta ana chjaya. Yoozquiztan anapan zaraka. Ana wal jar muntižtakaz ana cjee. Jalla nuž ana wal muntižtakaz cjequiz

niiqui, ančhucatami parti jilanacžtami ana wali kamañchiz cjesača. ¹⁶ Nižaza nii ana zuma kamañchiz Esaúžtakaz ana nižta cjee. Esaúqui adulteriuquiz ojklaychiča, nižaza Yooz kamaña ana importaychiča. Esaúqui jilir majch irinsiztan tsjii lujlz čheržtan campiichiča. ¹⁷ Nekztan wiruñ Esauqui ejpžquiztan jilir majch irinsa tanz pecatča. Niiž ejpqui Jacobžquiz tjaachitaž cjen Esaúžquiz ana tjaas atchiča. Niiž irinsa tjaatapanča. Wiruñ Esaúqui ancha kaacanami, ana jaknužumi irinsa tanzñi atchiča.

¹⁸ Ančhucqui Yoozquin macjatžquichinćhumča. Ančhucqui anača Israel žoñinacažtakaz Sinaí curquin macjatžquichinćhumcui. Nii curquiz žoñinacaqui ojklayča, nižaza lanža. Pero Yoozquin ana lanzñi atasača. Tuqui timpuqui Israel žoñinacaž Sinaí curquin macjatan nii curuqui ujnatača, nižaza tsokchi tsjiržtan weeztatača. Nižaza jorjorñimi lliwjlliwjñimi želatča. ¹⁹ Nekz žejlcan trompet jora nonziča. Nižaza Yooz jora nonziča, ninacžquin paljayžquini. Nii jora nonzñi žoñinacaqui roct'ichiča, ana iya chiižcajo. ²⁰ Nii joraqui tuž mantichiča: “Jakziltat tii curquiz macjatžcačhaja, maztan čhaje jawi contaž cjequiča, už pajk cuchillžtan contaž cjequiča. Žoñinacami animalanacami nižta macjatžcaquiz niiqui, contaj cjila”. Jalla nuž chiižinžquitiquiztan Israel žoñinacaqui ancha tsucchiča, nižta mantanaqui ana iya awanti atchiča. Jalla nižtiquiztan roct'ichiča, ana iya chiižcajo. ²¹ Ancha ispanchucanacatača nii chertanacaqui. Jalla nižtiquiztan Moisespachača tuž cjichiqui: “Wejrqui anchal tsucuča, nižaza kjarkatuča”.

²² Pero ančhucqui Sinaí curquin ana macjatžquichinčhucča. Ančhuczi arajpach žejtñi Yoozquin macjatchinčhucča, nižžquin kuz tjaachiž cjen. Jaziqui ančhucča arajpach Jerusalén wajtchiz žoñinacaqui. Nižaza Sión cjita curquiz macjattažokazza. Nii Sión cjita curuqui cjičha, arajpach Jerusalén watja, jalla nii. Arajpach Yooz wajtquin warank waranka anjilanaca žejlčha, Yoozquin rispitzjapa ajczñi. ²³ Nižaza Yooz wajtquin anjilnacžtan chica Yooz wajtchiz žejlñinacaqui ajcža, Yooz wajtchiz žoñinacžtanpacha. Jalla nii žoñinacž tjuunacaqui arajpach listiquiz cjiirtačha. Nižaza ančhucqui Yooz Jiliržquizpacha macjatchinčhucča. Nii Yoozza tjapa pjalñiqui. Nižaza ančhucatan zuma kamañchiz žoñinacž animunacžtan Yooz wajtchizza. Yoozqui ninacžquiz nižž irata ancha zuma kamañchizkaz cjiskatchičha. ²⁴ Nižaza ančhucqui Jesusižquin macjatchinčhucča. Niičha ew acta ut'aychiž cjen žoñinacžta tjurt'ižiničhi. Žoñinacžtajapa ticzičha. Nižaza žoñinacž laycu nižž ljocžtan sucarpaytažokaz cjichičha animal ljocžtakaz. Jesusiž ljoc tjawkchiž cjen, žoñinacaqui liwriita cjesačha. Abelž ljocqui žoñinaca ana liwriyasačha. Jalla nižtiquiztan Jesusiž ljocqui Abelž ljocquiztan tsjan cusačha.

²⁵ Jalla nižtiquiztan ančhucqui Yooz chiita taku anaž nicaquičha, panž catokz waquizičha. Tuqui timpuqui Yoozqui Sinaí curquiztan Israel žoñinacžquiz chiichičha. Nekztan ninacaqui nii chiita taku ana juyzu paachičha. Jalla nižtiquiztan ninacaqui castictatačha. Anziqqui Yoozqui arajpachquiztan učumnacaquiz chiižinžquičha. Nii chiižinta ana juyzu paaquiz niiqui, panž castictaž

cjequičha. Yoozquiztan anapan atipi atasachha. ²⁶ Tuqui timpuqui Yooz joraqui yokanaca chjekinskatchičha. Anziqqui cjičha: “Tsjižžtan yokanacami arajpachami chjekinskatačha”. ²⁷ “Tsjižžtan” cjicanaqui Yoozqui zizkatčha, Yooz paata yokanacami arajpachanacami liwž kataquičha. Nekztan ana chjekinskattanaca, niikaz želaquičha. ²⁸ Yooz watjaqui ana tjatantaž cjesačha, panž želaquičha. Učhumčha nii wajtchiz žoñinacaqui. Nižaza učhumqui Yooztan chica mantaquičha. Jalla nižtiquiztan učhumqui Yoozquin gracias cjižpan waquizičha. Nižaza tjapa kuztan, nižaza humilde kuztan Yoozquinž zuma rispitle, Yooz tsucchuca azi tjeezniž cjen, nii cjuñžcu. Jalla nuž rispitan Yoozqui cuntintu cjequičha. ²⁹ Cjuñžna. Učhum Yoozza tsjii anawalinaca ujžni ujztakazqui. Jalla ničha anawali žoñinaca casticničhi.

CHIIŽINTANACA

13 ¹ Jilanaca, cullaquinaca, porapat tirapan zuma munaziñi kuzziz cjee. ² Nižaza tjonžni žoñinacžquiz zuma pan kjawžna. Jalla nuž kjawžcuqui yekjap žoñinacaqui anjilnacžquiz atintichičha, ana zizcu. ³ Carsilquiz chawcta jilanaca panž cjuñžna. Ančhucazakaz persun kuzquiz ninacaž chawctiquiztan sint'iz waquizičha. Nižaza sufriskatta jilanacžquiz cjuñžna. Ančhucqui curpuchiz cjicanaqui zakaz sufriskatta cjesačha.

⁴ Tjapa ančhucqui lucutjiñi zalžcu, zuma lijitumaž cjičjiya. Tjunatan zalžcu zuma lijitumaž kama, ana yekja maatakžtan ojklayasačha. Jakziltat adulteriuquiz ojklayčhaja, jalla nižžquiz Yoozqui casticaquičha.

⁵ Ančhucqui anaž paazquin kuz tjaa. Žejlñi cusasanacžtan cuntintukaz cjee.

Yoozqui tuž cjichiča: “Wejrqui ančhuc anal jaytača, nižaza anal ecača”.

⁶Jalla nižtiquiztan ućhumqui ana jiwjatcan chiyasača, tuž cjican:

“Yooz Jiliricha wejtquiz
yanapñiqui. Žoñinacaž wejtquiz
čhjulu paachi cjenami anal
eksnsasača”.

⁷Ančhucqui icliz irpiñinaca cjuñzna. Ninacaqui ančhucaquiz Yooz taku paljaychiča. Jaknužt ninacaqui tjurt'ichi kuzziz ticzičaja, jalla nii cjuñzna. Ninacaž Yoozquin kuzziz kamta jalla nižta irataž kama.

⁸Jesucristuqui tuquitanpacha, anzimi, jaztanami tsjii kuzzizpanikazza, jalla niiča ana kuz campiiñiqui. ⁹Nižaza ančhucqui tjapaman tsjemata tjaa jintanacžquiz anaž incallskata. Cjuñzna, Yoozqui ančhucaquiz yanapaquiča, tjup kuzziz cjisjapa. Jalla niiqui tsjan yanapča, čhjeri lujlz cuzturumpiquiztanaqui. Jakziltat nii čhjeri lujlz cuzturumpinac jaru kamčhaja, jalla ninacžtaqui anaž yanapča juc'ant zuma kamañchiz cjisjapa.

¹⁰Ućhumnacaltaqui anača animal wilana žejlča. Tsjemat wilana žejlča, Jesucristupacha. Tuquita timplu jilirinacaqui anapanča nii wilana lujlchuca. ¹¹Tuquita lii jaruqui timplu chawjc jiliri qui conta wilan ljoc chjitchiča c'uchquin žejlñi Yooz kjuyquin, Yoozquin ofrenda tjazjapa, ujnaca pertunta cjisjapa. Nii wilanž curpunacaqui wajt tji pampiquin ujnitača. ¹²Jalla nižta irata Jesusaqui wajt tjiuquin ticziča, niž persun ljoc cjen žoñinacžquiz Yooz ancha zuma kamañchiz cjiskatzjapa. ¹³Ančhucqui ana wal kamaña eccu, Jesucristužquin macjatz waquiziča. Nekztan ućhum listuž cjee, sufrijjapa. ¹⁴Tii muntuquiz kamcan ana wiñaya tjurni

wajtchizčhumča. Pero ućhumqui arajpach watjaž ojkszjapa ancha tjewža.

¹⁵Jalla nižtiquiztan Jesucristužquin sirwican ućhumqui tirapan Yoozquin honora tjaaz waquiziča. Jalla nuž honora tjaacan wilana cuntaž cjequiča. Jaziqui ućhumqui persun atžtan “Yoozqui honorchizkaj cjila”, cjican chiiz waquiziča. ¹⁶Nižaza ančhucqui zuma paaznaca panž paa. Nižaza parti jilanacžtan ančhuca želinchizquiztan jama tojna. Nekztan ančhucaž zuma kamtiquiztan cuntintu cjequiča Yoozqui.

¹⁷Ančhucqui icliz irpiñinaca cazpanča, nižaza ninacž jaru cjee. Ninacaqui ančhuc cuitiñiča. Nižaza nii icliz irpiñinacaqui, jaknužt criichi žoñinaca cuitiñizlaja, jalla nii Yooz yujcquin cuenta tjaastanča. Ančhuc zuma kaman, irpiñinacaqui cuntintuž ančhuc cuitaquiča, ana llaquizcu. Ančhucqui ančhuca irpiñinacžquiz llaquiskataquiž niiqui, anapanž cusa cjesača ančhucaltajapaqui.

¹⁸Wejtnacaltajapa Yoozquiztan mayizina. Wejrnacqui zuma kuztanpan kamuča. Jaziqui wejtnaca kuzquiz ana zinta uj cjuñuča. Čhjulu paacanami zuma lijituma kamz pecuča. ¹⁹Nižaza wejtnacaltajapa mayizinalla, ančhucaquin wilta apura tjonzjapa, ana iya atajta cjisjapa.

²⁰⁻²¹Yoozza žoñinacž kuznaca walikaz cjiskatñiqui. Jalla niiqui ućhum Jesucristo Jiliriz ticziquiztan jacatatskatchiča. Jesucristuča ućhum chawjc Awatiriqui uzanaca itzniztakaz. Niiqui persun ljocžtan ew acta ut'aychiča wiñayjapa.

Jalla nižtiquiztan Yoozqui ančhucaquiz zuma kamañchizpankaj cjiskatla, niž kuzcama kamzjapa. Nižaza Jesucristuž cjen Yoozqui ućhum yanapla, zuma obranacami paazjapa,

nižaza zuma kamzjapa. Ančucaž zuma kamtiquiztan Yoozqui cuntintu cjequiča. Jaziqui Jesucristuqui wiñayjapa honorchiz cjila. Jalla nužoj cjila. Amen.

²² Jilanaca, cullaquinaca, ančucaquiz rocuča, weriž chiižinta taku zuma kuztan nonznaquiča. Tsjii kjaž takunaca tii cartiquiz cjiyrchinča.

²³ Učhum Timoteo jilaqui carsilquiztan liwriitača. Jalla nii ančucaquiz maz

pecuča. Timoteoqui tekz waj tjonaquiž niiqui, niižtan wejttan ančucaquin cherzñi okača.

²⁴ Tjapa icliz irpiñinacžquin tsaanžinalla. Nižaza tjapa Yoozquin criichi žoñinacžquiz tsaanžinalla. Nižaza Italiaquiztan tjoñi jilanacaqui ančucaquin tsaanžquiča.

²⁵ Yoozqui tjapa ančucaquiz zumapanj yanapt'ila. Jalla nužoj cjila. Amén.